

مسرحة

حكاية ملك طريقهما

إستعماريكا

تأليف وإشعار

محمد الصواف

الطبعة الأولى

الكتاب : حكاية ملك طربقها

المؤلف : محمد الصواف

تصنيف الكتاب : مسرحيات

لوحة الغلاف : المخرج محمد حسن

تصميم الغلاف : محمد جمال

إخراج : أحمد عبد الحليم

المقاس : ٢٠ × ١٤

رقم الإيداع : ١٧٨٢٠ / ٢٠١٥

الترقيم الدولي : 4 - 102 - 776 - 977 - 978

دار بسطرون



طباعة وتوزيع الكتب فى جميع أنحاء العالم

المكتبة والطبعة : ٣ ش صفوت - محطة المطبعة

شارع الملك فيصل - الجيزة

جمهورية مصر العربية

٠١١٥٧٧٦٠٠٥٢ - ٠١٢٢٩٣٠٠٠٢٩

مدير الإنتاج : أحمد عبد الحليم

رئيس مجلس الإدارة : عماد سالم

بريد إلكترونى : yastoron@gmail.com

موقعنا على الفيس بوك : مؤسسة بسطرون لطباعة وتوزيع الكتب

جميع الحقوق محفوظة للمؤلف

إهداء

إلى كل فرق الهواه الذين يحاولون
ممارسة اللعبة بروح المحترفين ..
وإلى كل المحترفين الذين
يمارسون اللعبة بروح الهواه

محمد الصواف

الافتتاحية

فتافيت أحلام
على أرض بتصرخ نار والآم
والناس مش ناس
الناس خفافيش
رافضين الحلم البكر يعيش
رافضين الجسد الحر يعيش
أو أى ضمير فى الدنيا يعيش
حاكمين على كل معانى الخير..
والنور والحق..
والقلب الطيب بالإعدام

ومزاد..

ألا أونا.. دوا.. تريه

ويوماتى بنتباع فيه للبيه

والبيه متباع لاولاد الإيه

والظلم بيكثر يوم عن يوم

وحنعمل إيه ولا نقول إيه

والله يا ناس ده كتير وحرام

والله حرام

المشهد الأول

المنظر

(حجرة المعيشة داخل شقة عامل بسيط فى دولة من دول

العالم الثالث)

شمس

تدخل شمس فى حالة من الإعياء والذهول بينما يأتى

: صوت العود من الداخل ليغلف المشهد)

لأ.. لأ.. لأ.. مش دول أهلك ولا دول ناسك.. دول دود

بيخرب فى اساسك.. أنا إيه فيّه.. بيخلى الناس طمعانه

فيّه.. ولا حواليه الدنيا اتغير حالها كتير.. وبقينا عايشين

زمن التجار، والاستثمار، والاستهتار بالمبدأ والأخلاق

والخير.. ولا الإنسان جوه الإنسان اتخصص واتفصص

وانهار.. كل شغل اروحه.. يبقى آخر حاجة شغلى

وعلمى وشهادتى ومهارتى.. والأهم من ده كله.. ابتسامتى

ومشيتى وفن إرضاء المدير.. قال لى هاتى دوسيه فلان

جيبتهوله.. قالى تانى شيليه مكانه شيلتهوله.. قال لى

هاتى وهاتى.. هاتى.. والف هاتى.. وقلت حاضر.. وفى

النهاية.. بص لى بعيون تعالب قال لى : عايزك.. اقللى
الباب وراكى.. مش كفايه يا حلوة تقل.. انتى إيه مش
حاسه بيّه.. وفجأة.. شوفت حيوان بيطاردنى.. وحش
فاتح بقه شهوة وكله رغبه فى التهامى.. ارتعشت
وخوفت.. وقادت النار جوه جسمى والحرايق.. وزى
مجنونه خبطته باللى كان قدامى.. وخرجت أجرى
أجرى.. أجرى.. وأنا طول السكه بالعن فقري والتعليم
وحظى والناس والظروف..

ملعون الشغل إن كان يرغمنى لرغبة كلب وضيع وحقير..
ملعونة اللقمة إن كنت حاكلها بذل وكذب ونص ضمير..
ملعونة الأرض إن كانت تربة حتدفن أحلام كل فقير.

نبهان : (يدخل) انتى جيتى يا شمس .

شمس : أيوه يا والدى جيت .

نبهان : فيه إيه يا بنتى؟ مالكا!

شمس : (ترتمى فوق صدره وتبكي)

نبهان : خير يا بنتى.. مالك.

شمس : أنا خلاص تعبت من الشغل اللى هنا.. والناس اللى هنا..

والعيشه اللي هنا.

نبهان : حصل حاجه فى الشغل ؟

شمس : زى اللي بيحصل فى كل شغل باروحه .. إيه رأيك
يا والدى لو نساfer؟

نبهان : نروح فين يا بنتى ونسيب بلدنا وأهلنا.

شمس : أى بلد غير هنا.. أنا خلاص زهقت .. زهقت.

عمران : (يأتى من الداخل ممسكاً بالعود) فيه إيه يا شمس؟!

شمس : فيه اننا لازم نساfer يا عمران.. نروح ندور على شغل فى
اى مكان.. يمكن نلاقى نفسنا فى أى بلد تانيه غير هنا.

عمران : أنا معاكى.. لكن ده قرار محتاج تفكير.

شمس : ولحد امتى حتقعد تفكر يا باشمهندس.. تقدر تقولى انت
قاعد لحد دلوقتى من غير شغل ليه؟

عمران : يعنى كنتى عايزانى اعمل ايه.. أروح اشتغل فى شركات
البيتزا والهامبورجر والشيكولاته والكاراتيه والبوزو..
وبكالوريوس الهندسه.. وسنين السهر والعلام والمذاكرة..
ألف فيهم سندوتشات!.. ولا عايزانى أكون وطنى وشارك
فى حضارة الأكل اللي بتتبنى فى بلدنا؟!!

نبهان : للأسف يا ابني.. هي دى الفرص المتاحة فى عصر
الاستثمار.. ولا انت فاكر إن أصحاب رؤوس الأموال
الأجنبية.. حيبجوا يببولك مصانع.. ويفجروا الطاقة اللي
جواك انت واللى زيك.. عقلنا اتحدد اقامته.. والخواجة
هو وبس اللي عقله يشتغل.. ويخترع ويصنع وينتج..
واحنا له مستهلكين.. ولا قول مستهلكين !!

عمران : يعنى كنت عايزنى أقبل أى شغل !؟

نبهان : لا يا ابني.. بس أنا كان قصدى أوضح الظروف اللي احنا
فيها.

شمس : يبقى يقعد فيها ليه ؟

عمران : وأنا حالى يفرق إيه عن ملايين عاطلين.. ع القهاوى
ملطعين.. أو فى جدران البيوت من شدة الجوع متدارين..
متخرجين للبطالة والخمول.. من سنين وسنين باستنى
الفرج.. والفرج عمّال يضيق.. لما خنق الحلم فيه
والطموح.. لزمته إيه العلام والكتاب والمدرسة..
والمحاضرات والمراجع ودراسات الهندسة.. فى العلام
ضاع نص عمرى.. والنهارده علمى متحنط فى عقلى..

ماشى زى تابوت بحثة معلوماتى.. واللى أنا اتعلمته

ودرسته فى حياتى.. يفرق إيه معناه عن النكتة القديمة!!

شمس : بس بقى وياك شهادة.

عمران : ورقة مالهاش أى قيمة.

نبهان : إيه الكلام ده بس يا ابنى.. ياللى عمرى ضاع عليك.. ده

أنا كنت اللقمة باحرم نفسى منها.. لجل اوفرك كتابك..

كنت باخرج م الوظيفة لشغل تانى وشغل تالت.. كنت

زى التور فى ساقية ليل نهار.. لجل اشوفك انت واختك

خطوه واخده الناس ليكره.

عمران : بكره.. بكره.. وفين ده بكره.. ومن ده بكره بقرشين.

شمس : وبكره جه.. كنت باحلم باللى أنا اتعلمته اعلم ناس

كثيره.. وابقى لتاريخ بلدى وتراثها سفيره.. وابنى جيل

فاهم وواعى.. فيه محبه وانتماء.. واشتغلت فى حاجه

تانيه بعيده خالص عن دراستى.. لأن ده كان المتاح

(بسخرية ومرارة) اشتغلت سكرتيرة.. وقلت ماشى..

قلت اشيل الحمل عنك.. بس زاد الحمل أكثر.. اللي

باخده يادوب يكفى المواصلات والقطار.. وان فى مرة قلت

يعنى أجيب لى شنطة ولا جزمة ولا تبيير أو بلوزه.. يبقى
نص الدخل طار.. واللى زاد على ده وغطى.. كل صاحب
شغل عايز منى حته.. ما انتوا عارفين الحكاية ولا هى
غريبة عنكم.

نبهان : يعنى إيه.. يعنى نور العلم ضلمه وضلام الجهل نور!!..

يعنى طول العمر باحرت أرض بور!!

عمران : انت جيبت التايهه يابا.. تفرق إيه أرض خصبة وأرض
بور؟!

نبهان : أرض خصبة.. أرض صالحة.. طارحة زرع كله خير.

عمران : وأرض بور؟

نبهان : أرض هى الموت بعينه.

عمران : والأرض الخصبة.. محتاجه لإيه؟

نبهان : لإيدين ترويهها وترعاها.

عمران : علشان نجنى وناخذ منها؟

نبهان : الثمره اللى احنا زرعناها.

عمران : وان أهملناها وسيبناها..؟

نبهان : حتماً حتبور.. وخيرها حيموت جواها.

عمران : ويجوز تطرح عبدة شياطين.. وشباب تايهين.. و إيدين

بتخرب باسم الدين.. ونقول إرهاب!

نبهان : قصدك!!

عمران : قصدى لو انت مازرعتش فيه حب الخير.. وربيتنى على

الفضيلة والقيم وحب بلدى والانتماء.. كان زمانى بارمى

قنبلة فى اتوبيس سياحة.. أو بخنجر ولاجنزير

أو رصاص الغدر باقتل أبرياء.

نبهان : ماتقولش كده يا عمران.. طبعاً مستحيل يا ابنى انك تعمل

شئ زى ده.. انت ناسى انك فنان.. وفنان كبير كمان.

عمران : اعمل إيه ما باليد حيله.. الطاقة اللى جوايا باطلعها فى

المزيكا.. الحاجة الوحيدة اللى بالاقى نفسى فيها.

شمس : ومين بيسمع المزيكا بتاعتك غيرنا.. البركة فى اللى غربوا

كل شئ حتى المزيكا.

عمران : كمان الحاجة اللى باحبها مش عايزانى امارسها.. يعنى

عايزانى عاطل من كل شئ؟!!

نبهان : إيه التشاؤم ده يا اولاد؟!!

عمران : ما تغالطش يا والدى نفسك.. أنت نفسك زينا خريج..

بس انت اتخرجت من المصنع على سن الخمسين.. يعنى
الحال من بعضه.. بس انتوا عملوا لكم للبطالة اسم شيك
"معاش مبكر".

- نبهان** : آه يا عمران يا ابنى.. دوست ليه ع الجرح .
- شمس** : يعنى كان لازم تجيب سيرة المصانع واللى حاصل فيها
إيه ؟
- عمران** : وفيها إيه؟!
- شمس** : ما انت عارف بابا لما نفكره بتبقى حالته عامله ايه.
- نبهان** : اللى اتبنى فى ثلاثين سنة.. بيتهدم ويروح بلاش.. والف
عمر بينتهى.. وحقد الخواجة ما انتهاش.. وادى آخرة
صبرى.. عاطل.. بس مكتوب فى البطاقة ع المعاش..
ثلاثين سنة.. والزمبلك بيتملى.. ويرن مع صوت الآدان..
قوم اصحى يانبهان.. ميعاد الشغل جه.. اقوم اتوضا
واصلى الفجر.. واخرج.. شوقى ي سابقنى لحبيبتى.. اللى
من طول عشرتنا صبحت حته منى.. ألمع فيها واحضنها
وابوسها.. وابندى الإنتاج.. ألف جزء وجزء يطلع.. تملأ
قلبي نشوة الجندى اللى بيحقق فى كل دقيقه أو ساعة
انتصار.. ياخذنى حماسى أنتج.. وافضل انتج.. أنتج..

وافتخر ان ده من صنعى.. وانه من ايديه طالع..
 سيمفونية حب كان عليها عرقى يرقص.. لما يعزف كل
 يوم مكن المصانع.. ويوم فى عمرى ما انساهوش.. جه
 المهندس قال لى : شوف يا نبهان.. الجزء ده من بلاد
 بره.. وعايزين زيه من ايديك.. ياترى حتعرف.. قلت له :
 ادينى ساعة.. ودارت المكنة وعقلى دار معاها.. وجانى
 فى ميعاده وقال لى : عملت إيه.. قلت له : الجزئين
 أهم.. قولى فين اللى صنعته واللى من صنع الخواجة..
 بص لى والدمعة جوه عينيه قالت لى.. انت تستاهل
 نيشان.. أنت انسان.. يبقى ليه بيخصصونا..
 يرخصونا.. يقصصونا.. يفصصونا.. ينقصونا.. بيعترونا.
 يظهر أن كل شىء بقى للبيع .

شمس

عمران : أنا مع شمس فى أننا لازم نساfer قبل ما نتباع احنا كمان.

نبهان : نسيب بلدنا اللى طول عمرنا عايشين فيها.

عمران : وهى دى عيشة!

شمس : واحنا خدنا منها إيه.. ولا هى تفرق إيه.. هنا زى اى

مكان نروحه.

نبهان لا يا شمس.. لا يا بنتى.. تفرق كثير.. وعلى رأى المثل..

يا معمر فى غير بلدك يا مربى فى غير ولدك.

عمران : وانت متمسك بيها ليه.. الشغل واديك قعدت منه..

والقرشين اللى طلعلوك شيلتهم فى البنك.. ولا انت

حتتاجر.. ولا احنا لينا فى البيع والشرا.. والبلد مش

ناقصه تجار.

نبهان : ايه اللى حصل لكم يا اولاد.. ما هو ده حالنا من زمان..

وهى دى بلدنا.. وطول عمرنا بنحبها ونموت فيها.. حتى

لو كنا بنموت فيها.

شمس : علشان خاطرى يا والدى وافق اننا نسافر.. خلاص زهقنا

طهقنا مش قادرين.

نبهان : يعنى ما فيش حل تانى؟

عمران : لأ ما فيش.

وشمس

نبهان : طب حنروح فين ؟

عمران : مدينة الذهب.

وشمس

نبهان : امرى لله.

إحلام

استعراض

(يجسد حالة الاغتراب والسفر والانتقال إلى مدينة الحلم)

توت توت توت توت

سفر يا قطر الغربية وفوت

توت توت توت توت

سفر بقى قربنا نموت

حتفرق إليه الغربية ما احنا فى بلدنا وغربا

والعيشة ضنك وصعبة والدنيا لسه بنت بنوت

رجع الزمن باشا رجع الفقير سخره

وعصابة هباشة حاجزين شמוש بكره

فوق سكة العتمة طال الطريق بينا

واللقمة والهدمة أسمى أمانينا

والعود نحيل فينا ووش الوطن ممقوت

واقفين على السلم الحاشية والسلاطين
تحت بـير السلم صف العبيد واقفين
وارقص على السلم يا لابس الزعبوط

توت توت توت توت
قبل الضحكة ما تتخصص
توت توت توت توت
قبل الكلمة ما تتقصص
توت توت توت توت
قبل ما نرخص ونهجص
هنا مقص و هنا مقص
وهنا الفقير دمه بيتمص
عشان فلوس البيه تترص
ويعيش وغيره انشا الله يموت

المشهد الثانى

مدينة الذهب

(الساحة)

(حيث نرى.. بيوتاً ، أبواب محلات مغلقة ، اقفالاً ،
حنفيات ضخمة للأكل والشرب ، أعمدة إنارة ،
أرصفة.. وقد صنعت جميعها من الذهب الخالص..
يظهر نبهان وعمران وشمس وقد استولت عليهم
حالة من الإعجاب والدهشة لما يرونه)

عمران : الله.. أما حته مدينة حكاية.. وأجمل بكثير م اللى
سمعناه.

شمس : واللى عرفناه واللى شوفناه.

نبهان : امال انتم كنتم فاكرين إيه.. دى مدينة الذهب اللى
تحت كل باب من أبوابها منجم ذهب.. أو زى
ماتقولوا كده عايمه على بحر من الذهب .

- عمران : ياه.. دى تبقى مدينة غنية قوى.
- شمس : عرفت بقى ان أنا كان عندى حق لما قلت لك نسا فر.
- عمران : لكن من ساعة ما دخلنا ما شوفناش دكان واحد مفتوح.. ولا شوفنا حد بيبيع ولا بيشتري.. ياترى الناس اللي هنا بيعلموا إيه.. وعاشين ازاي؟! (يدخل مندفعاً ناحية نبهان فى حالة من الهوس)
- الزنان : عايز اشتغل.. عايز اشتغل.
- نبهان : تشتغل ! تشتغل إيه ؟
- الزنان : أى شغل.. شغلونى.. والنبي شغلونى.. اعملوا معروف شغلونى.. أبوس إيديكم شغلونى (يبكى).
- عمران : قول لنا الأول أنت مين وإيه حكايتهك ؟
- الزنان : أنا الزنان.. وتعبان من قلة الشغل.. عيان من قلة الشغل.. شوفوا لى شغل.
- شمس : معقوله.. مدينة فيها كل الذهب ده.. ومش لاقى فيها شغل!!
- الزنان : ماهو ده اللي تاغبني.. عايز اشتغل.. شغلونى.
- نبهان : نشغلك إيه بس.. ده احنا كمان بندور على شغل.

الزنان : انتوا كمان بتدوروا على شغل (يضحك) وانا اللي كنت
فاكر إن أنا بس اللي عايز اشتغل (يضحك) ولسه
ياما بطن الزمن حتجيب.. فجر الحليب يغسل.. عار
الضمير الاسود.. حقد العدو الاسود .. قبل القلوب
ما تشيب (يضحك ويبكى) عايز اشتغل.. عايز اشتغل
(يخرج).

عمران : فاهمين حاجه ؟!

شمس : تلاقيه درويش.. أو واحد من ضمن المجاذيب.

نبهان : لو كان درويش.. كان يبقى فى ايده سبحة كبيرة
ولابس خيش.. وإن كان مجذوب.. ما يقولش كلام له
معانى بتوجع زى الطوب.. استنوا.. (نسمع اصوات
أهالى المدينة آتية من بعيد) سامعين اللي أنا سامعه!؟

عمران : ابوه.. يظهر أن فيه ناس جايبين على هنا.

نبهان : طب يللا بينا نتدارى لما نشوف إيه الحكاية.

(تدخل العجوز وأولادها وهم يجلسون فوق الأسرة
المتحركة بمعاونة مجموعة من الخدم الفلبينيين
والهنود وغيرهم من الجنسيات المختلفة والتي تعمل

فى خدمة الأثرياء، فننتعرف عليهم من خلال هذا

(الاستعراض)

العجوز : من غير مجهود وسهر وتعب
وأولادها

عائشين فى نعيم والعيشه عجب

نائمين صاحبين ما احناش داريين

الفجر آتانا ولا ذهب

والسما بتـمطر فـضة ساعات

وساعات مرجان وياقوت وذهب

سايب : (لخادم١.. الذى يقوم بدفع السرير الذى يرقد عليه)
ميدانه

أنا يا ابنى كفيل.. عنك.. وكفيل

أنى اخليك تلعن نفسك

ولبلدك ترجع راكب فيل

خد بالك قوى هنا من نفسك

قافل دكانه : (لخادم٢) زق يا خدام

خادم٢ : حاضر أمرك

قافل دكانه : وكمان بتزقق وتحمرق..

مخصوم من أجرك ست شهر

- قاعد مكانه : (لخادم ٣) عايز اتاوب.. اعطس.. اكح
- نايم زمانه : (لخادم ٤) طرّع لى صوابع رجليه
- اهرشى لى فى زهري بحنيه
- العجوزة : ماتروحشى بعيد يا قاعد مكانه.. تعالى هنا يا سايب
- ميدانه.. اوعى تقع يا قافل دكانه.. خد بالك يا خدام
من نايم زمانه.
- (يظهر نبهان وعمران وشمس)
- عمران : مين دول يا ست؟
- العجوزة : دول اسم النبى حارسهم ولادى.
- عمران : وهم لامواخذة يعنى قاعدين كده على طول؟
- العجوزة : وفيها ايه؟!
- عمران : فيها ايه ازاي!.. مابيقوموش.. مابيمشوش..
- مابيشتغلوش..؟!
- العجوزة : شغل ! (تضحك) كلمة الشغل دى نسيناها من زمان.
- شمس : يعنى انتوا كلكوا مابتشتغلوش؟
- قافل دكانه : واحنا ليه نشتغل ونتعب نفسنا!
- عمران : علشان تعيشوا .

- قاعد مكانه : ما احنا عايشين.. وبفلوسنا.. نقدر نجيب أى حد من
البلاد الفقيرة.. الحقيرة ونشغله هنا عندنا.
- نبهان : وأنتم قاعدين على طول كده من غير لا شغلة
ولا مشغلة!
- سايب ميدانه : احنا ما عندناش وقت للشغل واليوم يادوب على قد
الراحة وقد النوم.
- نايم زمانه : وهو فيه فى الدنيا اجمل من أننا ننام وقت ما احنا
عايزين.. ونصحى وقت ما احنا عايزين.
- نبهان : ازاي فيه ناس كده زيكم قادرين يعيشوا من غير عمل!
العجوز : البركه عندنا فى الذهب.
- نبهان : فجر الحياة لما برق.. ماكانش أبداً من ذهب.. ولا من
كسل.. ولا من عسل.. ولا من خشب.. ولا من ورق..
كان م العرق.
- العجوزة : واحنا عرقنا برفانات .. أما التعب ما نعرفوش
- شمس : معقوله فيه فى الدنيا ناس.. بيكسبوا وما يتعبوش!
- نبهان : وفيه كتير يا بنتى ناس.. بيتعبوا وما بيلاقوش

عمران : زى بلدنا

ناس فيها كتير زى حالاتنا

دايرين.. دايرين

دايرين بنلف مع الطواحين

وبننهج على لقمة عيشنا

دايرين دايرين..

مااحناش دايرين عايشين اليوم

ولا اليوم هو اللي عايشنا

فى الهم سنين بين الطواحين

والقرش رحى بتقرقشنا

واليوم بيعدى ما بنحسوش

شمس : وياريت كان بيكفى شقاناً..

إن بطونا تبات شبعانه

نبهان : الدنيا كده أرزاق وقسم

ناس طول عمرها عايشه جعانه

وفيه غيرهم ناس أبداً ما جاعوش

العجوزة : سلطانا الله يكرمه.. ويسلمه.. وينعمه

مهنى شعبه.. مريحه.. ومرحرحه.. ومنيمه

وعيب فى حق السلطنة.. من أهل كل السلطنة

لو حتى واحد يشتغل

- عمران : حاجة تغيظ
- اولاد العجوزة : ودى هوت دوک وتشيس بورجر
- ودى روزبيف وشاورمة تجنن
- عمران : حاجة تعکنن
- اولاد العجوز : ودى كاليمارى وماکس تشيکن
- وسموک تون وفرانش فرايز
- ودى واين وجن وشيفاز
- ودى فيديو ودش وتلفاز
- شمس : وفيه عندکو حنفيه ميّه ؟
- اولاد العجوز : حنفيه ميه من فيشى
- شمس : وفيه عندکو حنفيه عيش ؟
- اولاد العجوز : باتى بان وكيزر زيّه ما فيشى
- عمران : كل ده موجود فى الحنفيات ؟
- اولاد العجوز : واكثر موجود فى الحنفيات
- فى جميع شوارعنا .. حنفيات
- وفى كل بيوتنا .. حنفيات

- عمران : انا زى ما اكون باحلم بكاپوس
أو شاييف خيالات من كرتون
أنا صاحى يا شمس.. أنا باحلم.. ولا أنا مجنون
- شمس : اهدى يا عمران.. انت نسيت احنا جايين ليه؟
- عمران : علشان نتحسّر على حالنا.
- شمس : وليه ما تقولش اننا جايين نسعى ورا فرصة شغل
افضل.
- عمران : شغل ! (يضحك بمرارة) وهو فين الشغل ده؟!
- نبيهان : الشغل فى كل مكان موجود.. بس المهم اننا نسعى..
واحنا لحد دلوقتى ماسألناش على شغل.. استنوا بقى
انتوا.. وسيبوني اتصرف.. يا اهالى مدينة الذهب..
يا أهل الكرم والمروءة والشهامة.. احنا ناس اغراب عن
المدينة ومتعشمين فيكم.
- عمران : ما تخلّص يا والدى انت حتشحت .
- نبيهان : يا ابنى قلت لك الصبر.. (لأهالى المدينة) شوفوا
يا اخوانا.. باختصار كده.. احنا متغربين.. وسايبين
بلدنا.. وجايين هنا عشان نشتغل.

- العجوزة : بس كده.. بسيطة.. تشتغلوا عندنا.
- شمس : والنبي.. حتدونا كام؟
- العجوز : قد ما بتاخذوا فى بلدكم عشر مرات.
- شمس : سامع يا والدى.. طب وواحدة زيبى كده ممكن تشتغل
إيه؟
- العجوزة : انتى!! (تنظر اليها بازدراء) ممكن أشغلك عندى
هراشة.
- شمس : هراشة! هراشة يعنى إيه؟
- العجوز : يعنى تهersh لى ضهرى.. ورجلى.. ورقبتى.
- شمس : (فى زهول) إيه!؟
- سايب ميدانه : (لنهبان) أما أنت بقى ممكن اشغلك عندى
مطرقعاتى.
- نهبان : مطرقعاتى!
- سايب ميدانه : آه مطرقعاتى.. يعنى تطرقع لى صوابع رجليه وايديه
وشعرى.
- عمران : الله الله ع الشغل.. يعنى عايزنا نشتغل عندكم
خدامين!؟

قاعد مكانة : امال انتوا كنتوا فاكرين نفسكوا حتيجوا هنا تشتغلوا

إيه.. وزرا ولا سلاطين!!

عمران : يلا يا شوية تنابلة يا لمامة.. ده احنا نموت م الجوع

ونرجع بلدنا ماشيين ولا تتهان كرامتنا.. حتى لو كان

التمن كل كنوز الدنيا.

نبهان : يا ابني طول بالك.

عمران : اطول بالي إيه اكر من كده.. انت مش سامع بيقولوا

إيه!

قافل دكانه : انتوا بتشتمونا!!.. طب ورونا بقى حتشتغلوا إيه

وحتاكلوا منين!

شمس : حناكل من الحنفيات اللي فى الشارع .

نايم زمانه : الحنفيات اللي فى الشارع لأهالى المدينة.. لكن متحرمة

على الأغراب.

نبهان : متحرمة على الاغراب!.. طب والجعانيين؟!

قافل دكانه : يموتوا م الجوع.

عمران : مش حنموت م الجوع.. وحنفتح الحنفيات واللى

يحصل يحصل.

(يجرى عمران مسرعاً ناحية الحنفيات بينما نبهان
وشمس يحاولان منعه)

شمس : إهدا يا عمران.

نبهان : ارجع يا ابني ما تتسرعش.. مش عايزين ناكل.

(لا يأبه عمران لكلام والده واخته ويجرى مندفعاً إلى
الحنفيات وبمجرد أن يلمسها تنطلق صفارات الإنذار
من جميع جوانب الساحة فتدخل على إثر اصواتها
مجموعة من الحرس السلطاني للمدينة وتحاصر
المكان بقيادة قائد الشرطة)

ق الشرطة : انتشروا فى كل مكان.. اقبضوا عليهم..

(يقوم الحراس بالقبض على نبهان وعمران وشمس)

(ثم إلى الوزير المنتظر بالخارج) اتفضل يا سيدى
الوزير كبشان.. الجو أمان.

(يدخل الوزير راقداً فيما يشبه التابوت.. محمولاً
على الأعناق بواسطة أربعة من رجال الحرس
السلطاني.. وبعد أن يستقر بجوار قائد الشرطة
يخرج رأسه بحذر)

- الوزير** : قبضتوا على اللصوص يا قائد الشرطة ؟
- ق الشرطة** : واتحفظنا على كل الأسلحة اللي معاهم.
- الوزير** : والمتفجرات..!
- ق الشرطة** : أبطلنا مفعولها.
- الوزير** : عرفتوا اسم الجهة اللي بتمولهم؟
- ق الشرطة** : جارى الاستجواب.. لكن افراد التشكيل لسه مش عايزين يتكلموا.
- الوزير** : أنا حاعرف ازاي اخليهم يعترفوا.. هاتوهم ورايا على قصر السلطان نعلان.

إخلاء

المشهد الثالث

مدينة الذهب

(قصر السلطان نعمان)

(قاعة العرش داخل قصر السلطان.. حيث نرى فتحات إلى اليمين مؤدية إلى خارج القصر.. وفتحات إلى اليسار مؤدية إلى داخل القصر.. شاشة كبيرة فى العمق محاطة بمجموعة من الزاير (جهاز لاستقبال شبكة الأوسكار نت).. إلى يسار الشاشة حنفية الشهادات وهى عبارة عن حنفية ذات فتحة مستطيلة تسمح بخروج ورقه فى حجم الشهادة وذلك بمجرد أن يلمس زرايرها الزاراجى.. على مستوى أعلى فى الزاوية اليسرى نجد كرسى العرش، وهو مصمم بطريقة غير تقليدية.. مع إضفاء لون الذهب الخالص على جميع محتويات القصر)

دهب : إفهمنى يا والدى أرجوك.. أنا مش عايزاه.. مش ده
الإنسان اللى اتمناه.. مش حاضى لقلبى يبات مقهور..
ولا حلمى يطير بجناح مكسور.. أنا زى الشمس أحب
ادور... فى مدار القلب.. الدافى.. الوافى.. الصافى
اللى يدوبنى غناه.. اما حرب الجيران فلا.. لا يا والدى
والف لا.

السلطان : يا دهب يا بنتى اسمعيني.. حرب الجيران ده بيتمنى
كلمة منك.. وإيه اللى مش عاجبك فيه بس؟!

دهب : كل حاجة فيه مش عجبانى.

السلطان : لكن ده ابن عمك.

دهب : وهل صلة القرابة تديله الحق فى انه يتجوزنى؟!

السلطان : يا بنتى اعقلى.. حرب الجيران بعد وفاة والده.. أصبح
ملك مملكة طريقها.. يعنى مكانته مش بسيطة.. وانتوا
الاثنين بيجمع بينكم الدم الملكى.

دهب : القلب إن حب ما بيفرقش.. واما بيختار.. بيشوف
الناس من غير ألقاب.. وساعتها بيتساوى جوه
الشرابين.. الدم الأزرق والأحمر.

السلطان : ما تنسيش إن انتوا مخطوبين لبعض من وانتوا لسه صغيرين.

دهب : ما نسيتهش يا والدى.. لكن لما خطبتونا لبعض واحنا صغيرين.. لا انت ولا عمى كنتوا تعرفوا إيه المكتوب فى الغيب.. ولا تتصوروا إن حرب الجيران فى يوم من الأيام سيكون بالعنف والدموية اللي هو فيها دلوقتى.. أرجوك يا والدى ما ترغمنيش على إنسان عمري ماحسيت تجاهه غير بالنفور والاشمئزاز.. ومع ذلك أنا مستعدة اتجوز من حرب الجيران وانفذ أوامرك.. حتى لو كان التمن هو حياتى وأحلامى وسعادتى!؟

السلطان : لا يا دهب.. لا يا بنتى.. ما تقوليش كده.. أوامر إيه وكلام فاضى إيه.. هو فيه سلطان يعمل سلطان على بنته.. ده أنا ماليش فى الدنيا غيرك.. وإذا كنت يعنى عايزك تتجوزى من ابن عمك.. ده لأنى كنت عايز اضمن لك السعادة والمستقبل وقلبي يطمئن عليكى.. لكن طالما أنتى مالكيش رغبة.. انسى موضوع الجواز ده خالص.. وحرب الجيران أنا حاعرف ازاي اقنعه.

(يدخل الوزير وقائد الشرطة ونلاحظ أن قائد الشرطة ملازم دائما للوزير كأنما وجد في هذا المنصب فقط من أجل حماية وأمن الوزير)

الوزير : مولاي السلطان نعلان.

السلطان : فيه إيه يا وزير كبشان؟

الوزير : مؤامرة بتدبر ضد مولاي فى الخفاء .

السلطان : مؤامرة !

دهب : مؤامرة إيه يا وزير؟ .. اتكلم .

الوزير : مجموعة من الاغراب .. حاولوا نشر الفوضى وزعزعة أمن

البلاد.. لكن عيون وزيرك المصححة والمفتحة

والسهرانة على حماية وأمن مولاي.. تمكنت من القبض

عليهم.

السلطان : وفين هم المجرمين دول ؟

الوزير : قائد الشرطة .. هات المجرمين.

قائد : كبير الحراس .. هات المجرمين.
الشرطة

(يدخل نبهان وعمران وشمس محاطين بمجموعة من

الحراس)

- السلطان** : انتوا مين.. وجايين هنا ليه.. وإيه حكايتكم؟
- نبهان** : احنا يا مولاي السلطان.. ناس بنلاقى راحتنا لما بنشقى ونتعب.. ناس بنحس بروحنا لما جبيننا بيعرق..
- أما جايين منين.. فاحنا جايين من أحلى وأجمل وأعظم بلد فى الوجود.. واللى جابنا.. من كام سنه فى بلدنا.. ضاقت بينا الحالة.. سيينا بلدنا وجينا.. لكن بعد ما جينا.. قلنا ياريتنا ما جينا.
- الوزير** : يعنى مش عاجباك مدينة مولانا السلطان؟
- دهب** : استنى انت يا وزير.. واضح من كلامهم وملامحهم أنهم مش مجرمين.. ولا إيه يا والدى؟
- السلطان** : حنشوف دلوقت يا دهب.. كملوا..
- شمس** : بعد ما جينا.. شوفنا مدينة جميلة سحرتنا بأعاجيبها..
- قلنا اكيد حنعيش.. فيها ومش حنسيبها.. بس لقينا الناس.. فاقدين الإحساس.. ومش حاسين بدهبها.
- الوزير** : شعب مولاي فاقد الإحساس.. سامع يا مولاي!
- دهب** : أرجوك يا وزير ما تقاطعهمش ...
- الوزير** : مولاي !

- السلطان : (يشير إليه بيده ليسكت) هش
- دهب : (تقترب من شمس وتسالها) انتى اسمك إيه ؟
- شمس : شمس الزمان .
- دهب : اسمك جميل قوى يا شمس.. وأنا دهب بنت السلطان نعيان.
- عمران : وعلى الشغل سألنا.. عرضوا علينا وظايف تافهه وضيعه رفضنا.. جعنا.. وكل الشارع من حوالينا فيه الأكل وفيه الشرب فى الحنفيات.. رحى افتحها.. قبضوا علينا .
- دهب : (لشمس) مين ده؟
- شمس : أخويا عمران.
- دهب : (لعمران) واللى يدخل البلاد.. يدخلها من أبوابها.. ولا من حنفياتها؟!
- الوزير : يا مولاتى الأميرة.. دول ناس خطيرين.. واحنا كنا مراقبينهم من أول ما ظهروا ع الحدود.
- نبهان : سلطان الجوع يا مولاتى أقوى من سلطان العقل.
- السلطان : وسلطان البلاد.. آخر من يعلم بدخول الأعراب !!

- نبهان : الغريب أعمى حتى ولو كان بصير يا مولاي.
- السلطان : لسانك فصيح.. وردك بليغ.. انت اسمك إيه ؟
- نبهان : نبهان يا مولاي.
- السلطان : يا نبهان.. اليوم ده من كل سنة هو يوم منح الشهادات وتسمية المواليد والعفو عن المذنبين.. وأنا أصدرت فرمان بالعفو عنك أنت وأولادك.. ومن النهارده أنتم ضيوف فى القصر السلطانى لحين قراركم بالرحيل .
- نبهان : دام لنا عز مولاي .
- دهب : تسمح لى يا والدى أشرف بنفسى على ضيافتهم؟
- السلطان : طلبك مجاب يا أميرة.. اتفضلوا.. ولو أنى كنت افضل انكم تحضروا الاحتفال.. لكن واضح انكم محتاجين للراحه والطعام ...
- (يخرج نبهان وشمس وعمران مع الأميرة دهب)
- الوزير : لكن يا مولاي..
- السلطان : ابدأ الاحتفال يا وزير.
- الوزير : اسمحوا للأهالى بالدخول.
- ق.الشرطة : اسمحوا للأهالى بالدخول.

- ر. الحرس : اسمحوا للأهالى بالدخول .
- (يدخل مجموعة من أهالى المدينة)
- السلطان : زرارجى.. حنفية الشهادات جاهزة؟
- الزرارجى : تحت أمر مولاي .
- الوزير : (لقاعد مكانه) مواليد ولا شهادات؟
- قاعد مكانه : شهادات.. أنا خدت شهادة الإعدادية وعازير الثانوية.
- الوزير : ثانوية إيه.. زراعى ولا صناعى ولا تجارى ولا ثانوية عامة؟.. حدد .
- قاعد مكانه : ثانوية عامة لأنى ناوى أكمل.
- الوزير : ايه رأى مولاي ؟
- السلطان : يمنح الشهادة.
- الوزير : اسمك إيه ؟
- قاعد مكانه : قاعد مكانه ابن خايب الرجا ابن المتعوس.
- الوزير : (للزرارجى) شهادة الثانوية لقاعد مكانه ابن خايب الرجا ابن المتعوس (الزرارجى يضغط على عدة زراير فتخرج من حنفية الشهادات شهادة الثانوية العامة ويقوم بتسليمها للوزير الذى يذهب بها إلى السلطان)

- الوزير : الاعتماد يا مولاي .
- السلطان : يضع اصبعه الابهام فى الختامة ويبصم على
الشهادة) مبروك .
- الوزير : اللى بعده .
- الاهالى : (تتداخل الأصوات) أنا.. أنا..
- مهزوزة : (فتاة ممشوقة القوام تتثنى فى دلال) أنا .
- الوزير : تعالى انتى .
- الفتاة : (فى دلال تقترب من الوزير) تحت أمرك .
- الوزير : دانا اللى تحت أمرك (ينتبه لوجود السلطان
والأهالى).. مشاهيد ولأ ولادات.. قصى مواليد
ولأ شهادات؟
- الفتاة : (تقترب من الوزير أكثر) شهادات .
- الوزير : الشهادة لله انتى حاجة ما حصلتش .
- السلطان : فيه إيه يا وزير ؟ مالك اعصابك مهزوزة ومش على
بعضك ليه ؟
- الفتاة : نعم يا عمو السلطان بتنده على؟
- السلطان : لا.. أنا باكلم الوزير .

- الفتاه : مش جلالتك قلت مهزوزة.. أنا اسمى مهزوزة.
- السلطان : اسمك مهزوزة!!
- الفتاة : مهزوزة بنت مش على بعضه ابن ديسكو.
- السلطان : وعايظه إيه يا مهزوزة ؟
- الفتاة : شهادة بكالوريوس التجارة
- السلطان : لا.. تجارة إيه.. التجاره صعبة عليكى.. انتى تاخدى بكالوريوس إعلام.. سياحة..
- الفتاة : اللى تشوفه يا عمو السلطان.
- السلطان : (للوزير) اديها بكالوريوس.. (ينظر اليها) ولا اقولك ماجستير (ينظر اليها).. لا لا.. ماجستير إيه.. اديها دكتوراه .
- الوزير : (للزارجى) شهادة دكتوراه سايحه (مستدركاً)..
- سياحة للمهزوزة بنت مش على بعضه ابن ديسكو
- (الزارجى يضغط على الزارير فتخرج الشهادة..
- يسلمها للوزير الذى يذهب بها إلى السلطان) الاعتماد
- يا مولاي .
- السلطان : (يقوم باعتماد الشهادة) مبروك .

- الوزير : اللى بعده
- الأهلى : (تتداخل اصوات الأهالى فى تزاخم) أنا.. أنا.. أنا.
- العجوزه : ياريتنى كنت صغيرة شويه وحلوة كان زمان الوزير خد
باله منى .
- الوزير : بتقولى إيه يا وليه انتى.. تعالى.. عايزه إيه ؟
- العجوزه : بنتى خلفت ولد وعايزه له اسم وشهادة ميلاد.
- الوزير : زرارجى.. قولها ع الاسامى اللى عندك خليها تختار لها
اسم .
- الزرارجى : (يضغط على الزاراير فتظهر على الشاشة - شاشة
الأوسكارنت -الأسماء الآتية) حامل.. يائس.. كاسل..
فاسد.. تايه..
- السلطان : مافيش أسامى تانية ؟
- الزرارجى : هى دى الأسامى اللى بعثها الملك أوسكارو النهارده
يا مولاي .
- العجوزه : خلاص.. يبقى تايه .
- الوزير : أبوه اسمه إيه ؟
- العجوزه : قرفص ابن حاطط إيده على خده .

- الوزير** : (للزراحي) شهادة ميلاد لتايه ابن قرفص ابن حاطط
إيده على خده .
- الزراحي** : (يضغط حنفيه الشهادات فننزل شهادة الميلاد وتسلم
للوزير الذي يقوم باعتمادها من السلطان ويسلمها
للعجوزه)
- الوزير** : اللي بعده .
- الاهالي** : انا.. انا..
- الزنان** : (بصوت مرتفع) أنا.. أنا اللي ما حدش حاسس بيه.
- الوزير** : عايز إيه يا راجل انت ؟
- الزنان** : عايز اشتغل.
- الوزير** : وهو فيه حد من رعية مولانا السلطان بيشتغل.. يا قائد
الشرطة.. يا حراس.. اقبضوا عليه.
- السلطان** : استنى يا وزير.. مين الراجل ده؟
- الوزير** : ده الزنان يا مولاي.. من أهالي المدينة لكن مجنون وعمره
ما بطل زن.
- السلطان** : وازاي عايز تقبض على مجنون.. ليس على المريض
حرج.. تعالى يا زنان.. انت عايز تشتغل ليه.. انت
ناقصك حاجة؟

الزنان : ناقصنى كتير يا مولاي.

السلطان : زى إيه .. الأكل فى الحنفيات .. اللبس فى الحنفيات ..

الأجهزة فى الحنفيات .. وكل ما تشتهييه النفس أو يخطر

على عقل بشر موجود فى الحنفيات .. يبقى إيه اللى

ناقصك؟ عايز شهادة .. حنفيه الشهادات موجودة ..

أديك أعلى شهادة من غير ما تذاكر ولا تمتحن ولا تقرا

كلمة واحدة .. يبقى إيه اللى ناقصك علشان تشتغل؟

الزنان : ناقصنى روح الإنسانية .. إحساسى بالدنيا حواليه ..

نبض الوجود فيه .. ناقصنى الشغل .. عضلاتى ضعفت

من قلة الشغل .. عقلى اتجمد .. حماسى اندفن فى سراير

النوم والخمول .. ناقصنى حبات العرق .. تنزل على

الأرض الشراقى .. تجرى فى شرايينها حياة .. تنزل

على المكن اللى صدى تدوره إنتاج عليه اسمى .. تملا

دواية حبر تجرى من سن القلم مشاريع تخلى الناس

خلية نحل .. وتصحى م التوابيت العزم اللى مات.

السلطان : انت بتقول إيه يا راجل انت .. حد يكره الراحة ؟!

الوزير : ما تاخذش على كلامه يا مولاي وتزعل نفسك ..

ده مجنون ابن مجنونة.

السلطان : ده أنا كل اللي با عمله ده عشان راحتكم.. وعشان
أحقق لكم الحياة اللي يتمناها أى شعب فى
الدنيا...أرضنا مليانة ذهب.. والذهب بالنسبة لنا مالوش
أى قيمة.. باديه للملك أوسكارو ملك مملكة
استعماريكا.. وهو بيعمل لنا كل حاجة فى المدينة..
يبقى ليه نشتغل ونتعب نفسنا ؟

الوزير : يعيش السلطان نعان.

الاهالى : يعيش السلطان نعان.

الوزير : يعيش الملك أوسكارو.

الاهالى : يعيش الملك أوسكارو.

الزنان : جايه التعالب للغنم لابسة وشوش فوق الوشوش.. وشوش
حبايب لجل الغنم تسمّن الليّه وتنفخ فى الكروش..
وتبقى وجبه شهية لجيوش التعالب.. والغنم هم الغنم..
طول عمرهم ما اتغيروش.. بيشوفوا بس ما بيّفهموش..
وان حتى فهموا ما بيّفوقوش.. عايز اشتغل (يضحك)
ويبكى فى هوس كالمعتاد ويجرى مسرعا خارج القصر)
الوزير : يلا يا مجنون يا ابن المجنونة.. (للأهالى) اللي بعده.

السلطان : كفاية كده النهارده يا وزير.. أنا محتاج استريح.

الوزير : يلا يا اخويا أنت وهو اتفضلوا .

شاب ١ : أنا لسه ما خدتش الشهادة بتاعتى.

شاب ٢ : وأنا مراتى خلفت توأم عايز اسميهم.

الوزير : السنة الجاية زى النهارده ابقوا تعالوا .

(يخرج الأهالى)

شمس : (تدخل فى حالة من النشوة والسعادة وهى مرتدية

فستان أهدته لها الأميرة ذهب)

أما العيشة هنا حلوة بشكل.. حاجة بقى يا ابنى ولا فى الأحلام.

عمران : لكى حق.. ما انتى من ساعة ما بدأتى تلبسى فساتين

الأميرة ذهب.. وانتى افنكرتى نفسك بقيتى الأميرة شمس بنت السلطان نبهان .

شمس : بتتريق.. وليه ما ابقاش الأميرة شمس؟

عمران : لأن ابوكى مش السلطان نبهان.

شمس : أهو انت كده.. ما اخدش منك غير الفلسفة اللى تجيب

الفقر.

عمران : أهو الفقر اللي ماكانش عاجبك أحسن من الذهب اللي
احنا غرقانين فيه مليون مرة.. على الأقل لما الواحد كان
بيقابل مشكلة ولا بيحس بالألم والمعاناة.. كان بيحس
أنه عايش.. لكن هنا مافيش أى إحساس بأى شىء.

شمس : انت اللي من جواك رافض تحس بالعز اللي حواليك..
وهو فيه أجمل من هنا.. لا صحيان بدرى ولا زنقة
مواصلات ولا صاحب شغل يببصلى على أنى من
وما ملكت أيمانكم.. ولا انتظار بكره اللي من أول
ما اتولدت ما بيجيش.. وكله كوم يا ابنى والستات اللي
هنا كوم.. مستريحين آخر راحة.. لا غسيل ولا طبيخ
ولا أى حاجة.. كله بالريموت.. ناقص بس أن السلطان
يجيب لهم ناس تحبل بدالهم.

عمران : وإيه كمان يا أميرة شمس؟!.. ده انتى ناقص تكتبى
شعر فى المدينة.

شمس : فكرتنى.. عايزاك تكتب لى طلب للسلطان بتعيين
حنفنجى.. يفتح لى حنفيات الأكل بدال ما اتعب نفسى
وأقوم م السرير.

- عمران : وانتي ما تكتبيش الطلب ليه ؟
- شمس : لسه حامسك القلم.
- عمران : نعم يا اختي!! فين ابوكى يشوف اللى انتى فيه!
- (ينادى) يا بابا.. يا عم نبهان.. تعالى شوف بنتك.
- نبهان : (يدخل ومعه مجموعة من المشغولات الذهبية) إيه
- يا ابنى! .. بتزق ليه؟.. انت فاكر نفسك فى بيتكو..
- ده انت فى قصر السلطان.
- شمس : بعد إذنك يا والدى أنا رايحة أنام شوية.
- نبهان : وماله يا بنتى نامى واتمتعى.
- شمس : (تخرج وهى تُخرج لسانها لعمران كالاطفال)
- عمران : تنام إيه بس.. دى لسه صاحية من النوم.
- نبهان : يا ابنى وانت حاطط نقرك من نقرها ليه.. سيبك منها
- بقى وخليك معايا.. اسمع.. أنا عملت فى الأوضة
- بتاعتى ورشة.
- عمران : ورشة!.. ورشة إيه يا والدى انت راخر!.
- نبهان : ورشة ذهب.. شوف أنا صنعت إيه (يخرج من جيوبه
- بعض المشغولات الذهبية).

عمران : الله.. معقوله يا والدى انت صنعت الحاجات دى..

تسلم ايدك يا اسطى نبهان.. لكن صنعتها إمتى وازاى؟

نبهان : ما هو ما أقدرش اقعد من غير شغل.. لازم إيدى تشتغل

وعقلى يشتغل وإلا أموت ... المهم قعدت أفكر.. تعمل

إيه يا نبهان .. تعمل إيه يا نبهان.. واخيراً وجدتها..

المدينة مليانة ذهب ...والذهب فى الشوارع ما لهوش

اى قيمة.. يعنى المادة الخام ببلاش والصنعة فى إيدى..

يبقى مش ناقص غير أنى ابتدى.. وابتديت.

عمران : لكن اتعلمت حكاية تصنيع الذهب دى إزاى ؟

نبهان : قبل ما اتعين فى المصنع.. اشتغلت فى مهن كتيرة

وبلاذ كتيرة.. وقريت واتعلمت وعرفت.. وده اللى خلى

الناس بدل ما يقولولى يا اسطى نبهان.. يقولولى يا حكيم

نبهان.

عمران : تعرف يا والدى أن الذهب اللى هنا لو اتباع بعد تصنيعه

بالشكل ده.. ممكن يجيب أضعاف تمنه وهو خام.. لكن

إزاى أهل المدينة مش واخدين بالهم من الحكاية دى.

ذهب : (تدخل) حكاية إيه يا عمران؟

- عمران** : مولاتى الأميرة !
- دهب** : إيه .. جييت فى وقت مش مناسب ؟
- عمران** : بالعكس .. ده انتى جيتى فى وقت مناسب جداً كمان ..
- اصل والدى ..
- دهب** : (تقاطععه) أنا سمعت وشففت كل حاجة ..
- (تأخذ المشغولات) الله .. تسمح لى احتفظ بيهم يا حكيم
نبهان.
- نبهان** : بس كده .. ده انتى تؤمرى يا مولاتى .. يا سلام .. ليكى
عليه من بكره إن شاء الله افرجك على حاجات أجمل
من دى .. ودلوقتى بالإذن يا مولاتى.
- دهب** : اتفضل يا حكيم نبهان.
- عمران** : إيه يا والدى حتسيبنى ورايح فين ؟
- نبهان** : اصلى علمت ثلاثة أربعة من الخدم اللي فى القصر
تصنيع الذهب .. وساييهم دلوقتى لوحدهم .. ما تعطلنيش
بقى احسن يبوظوا الشغل .. وبعدين يا اخى اتلحاح ..
الأميرة عايزه تتكلم معاك .. إيه خايف من إيه .. هى
حاتكلك (يخرج).

ذهب : عمران.. ما قتلش.. أهل المدينة مش واخدين بالهم من إيه؟

عمران : من الكنوز اللي بين إيديهم.. معقولة يا مولاتي فيه حد يبقى عنده مدينة جميلة زي دى ويجيب غيره يعمرها له .

ذهب : تقصد مين بغيره.

عمران : أوسكارو ملك مملكة استعمارىكا.

ذهب : لكن ده صديق والدى.

عمران : صديق الذهب والاستعمار والسيطرة والخراب.

ذهب : ايه اللي بتقوله ده يا عمران! الملك أوسكارو عمل مشاريع كتيرة مفيدة للمدينة.

عمران : وقبض التمن ولسه بيقبضه لحد النهارده.. ذهبكم

وولائكم ليه.. وروحكم اللي قضى عليها.. بكل مشاريع

الرفاهية اللي عملها.. ما سألتوش نفسكم يا مولاتي لو

الذهب اللي عندكم خلص حتعملوا إيه وتعيشوا ازاي؟!

ذهب : ونسأل نفسنا ليه.. عمر الذهب اللي فى أرضنا ما حيخلص.

- عمران** : مين قال كده؟!
ذهب : أوسكارو.
عمران : لازم يقولكم كده.. لأنه لو قالكم الحقيقة حتفوقوا وتفكروا فى المصير اللى ممكن تواجهوه فى يوم من الأيام.. وده اللى مش عايزه أوسكاروا.. عايزكم تفضلوا طول عمركم نايمين فى سراير الجهل والتخلف.. ما عندكوش أى فكرة حتى عن خير أرضكم.
ذهب : مش فاهمه! .. وضح.
عمران : تقدرى تقولىلى يا مولاتى مين فى المدينة بي فهم فى أنواع الذهب؟
ذهب : مافيش.
عمران : مين بي فهم فى طرق استخراجة وتصنيعه؟
ذهب : مافيش.
عمران : مين يعرف عمر الذهب اللى تحت كل باب قد إيه ؟
ذهب : مافيش.
عمران : والمدينة اللى أهلها ما يعرفوش أى حاجة عنها.. ازاي حينتموا إليها ويحبوها ويحموها ويدافعوا عنها؟

- ذهب** : عندك حق.. والحل؟
- عمران** : الحل أن أهل المدينة لازم يفوقوا.
- ذهب** : بعد السنين دى كلها اهل المدينة يتغيروا.. ده مستحيل.
- عمران** : اللي عنده إرادة وإيمان بقضيته ما يعرفش المستحيل.
- ذهب** : اللي انت بتقوله ده يا عمران شئ جميل لكن أشبه بحلم.. حلم صعب انه يتحقق.
- عمران** : الحلم اللي صعب أنه يتحقق.. هو اللي صاحبه رافض أنه يتحقق.
- ذهب** : تقصد ايه؟
- عمران** : أقصد أن ذهبكم كان بالنسبة لأوسكارو حلم وسعى لتحقيقه.. وعشان كده حلمه اتحقق فى الاستيلاء على ذهبكم.. ومين عارف يمكن لسه له أحلام تانيه.
- ذهب** : تعرف يا عمران.. برغم أنى أميرة وعائشة فى قصر أشبه بأساطير الحواديت القديمة والحكايات اللي فوق حد الخيال.. لكن عمرى ما حسيت بالسعادة.. لكن دلوقتى حاسة بشئ بيحرك كل أحاسيسى.. يمكن تكون هى دى السعادة اللي سمعت عنها كتير لكن ما عرفتهاش!؟

عمران : السعادة يا مولاتى ما تتحققش غير بالعمل والنجاح
وسعيينا نحو هدف.. وإذا كان مافيش عمل نمارسه يبقى
مافيش نجاح حنققه.. لأن مافيش هدف بنسعى
للوصول إليه.. وفى الحالة دى منين حنحس
بالسعادة!!

دهب : وتفتكر أهل المدينة ممكن يحلموا زي أنا ما بدأت
أحلم؟!!

عمران : ويحققوا كمان حلمهم.. ده لو آمنوا بيه.

دهب : وبعد ما يآمنوا؟!!

عمران : يسعوا لتحقيقه.

دهب : دلوقت بس بدأت اشعر بالسعادة أو زى ما يكون فى
الأفق بيبتدى يظهر هدف.. سحب الكآبة والملل قدام
عينية واحدة واحدة بتختفى.. وبيتولد إحساس جميل
من الندى والفجر وشعاع القمر.. الله عليك.. كل القلق
بيضيع فى نظرة من عينيك.. أنا كنت فعلا محتجالك
من زمان.

عمران : مولاتى أنا رهن البنان.

- ذهب : عمران.
- عمران : مولاتي.
- ذهب : ذهب من غير مولاتي.
- عمران : لكن يا مولاتي!! ...
- ذهب : ما لكنش يا عمران.
- عمران : ذهب يا نسمة النور والحياء.. وحب واصل منتهاه..
يا حلم فوق الممكنات.. فجأة بتتفسر رؤاه.
- (صوت الحاجب يمزق الحالة الرومانسية لعمران
ودهب)
- الحاجب : الملك حرب الجيران ملك مملكة طربقها.
- : (يدخل الملك حرب الجيران مرتدياً زيّاً عسكرياً
موشى بمجموعة من النياشين العسكرية، واضعاً حول
وسطه حزاماً به العديد من الاسلحة المتنوع - سيف -
مسدس - رشاش - قنبلة يدوية.. ويحمل فى يده
دبابة صغيرة)
- ح.الجيران : ذهب.. ازيك يا ذهب.. صحتك عامله إيه.. بمب.
- ذهب : (بسخرية) بمب! (بابتسامة مفتعلة) الحمد لله يا أمير.

حرب : أمير! أمير إيه يا أميرة! أنا دلوقتى الملك.. ملك مملكة
طربقها.. مملكتى من أقوى الممالك عسكرياً.. شوفى أنا
جيببت لك إيه (يقدم لها الدبابة).

ذهب : دبابة !!

حرب : كنت عارف أنها حتعجبك.. مع أنى كنت عايز أجيبك
قنبلة صغيرة.. بس خفت احسن تنفجر.. وانتى عارفه
حياتك غالية عندى قد إيه.

ذهب : (لعمران) الملك حرب الجيران ابن عمى.

حرب : وخطيبك.

ذهب : ده موضوع أنا لسه ما خدتش فيه قرار.. (تشير إلى
عمران) أعرفك.. عمران.

حرب : وانتى من امتى بتعرفينى على الخدم بتوعك!.

عمران : ياما فيه كتير ملوك لكن خدام.. خدام لرغابتهم ونزواتهم
وشهواتهم يا ملك.

حرب : مولاك الملك يا كلب (يقوم بنزع السيف من جرابه
ويهم بضرب عمران) أنا حاعلمك ازاي تتكلم فى حضرة
الملوك يا وقح.

- دهب : (تمنع حرب الجيران وتحول بينه وبين عمران)
حرب .. أنا ما اسمحكش تهين ضيوف والدى بالشكل
..هـ
- حرب : ضيوف والدك ولاّ ضيوفك يا أميرة؟! .
- دهب : (بغضب شديد) حرب.. الزم حدودك (لعمران) أنا
آسفه يا عمران.. ارجوك اتفضل انت دلوقتى.
(يخرج عمران كاظماً غيظه)
- حرب : أنا عارف حدودى كويس.. لكن غيرى هو اللى تعدى
الحدود.
- دهب : انت بأى حق تكلمنى باللهجة دى؟.
- حرب : بحق انى خطيبك.
- دهب : كده بالبساطة دى.. من غير ما تعرف رأيى!.
- حرب : وانتى ليكى رأى تانى غير رأى الملوك؟!.
- دهب : رأيى فيك انت عارفه من زمان.
- حرب : من زمان.. واحنا مخطوبين لبعض.. وبنحب بعض.
- دهب : أنا عمرى ما حبيتك.
- حرب : لكن أنا بحبك يا دهب.

ذهب : أنا مش مسئولة عن أوهام أنت خلقتها وعيشت نفسك فيها.. حب إيه اللي بتتكلم عنه واحنا بقى لنا اكثر من تمن سنين ما شفناش بعض!.

حرب : كنت بأمن مستقبلى ومستقبلك.. بابنى جيش من الأشاوس المغاوير.. قلبهم من حديد وعزمهم من نار.. جيش يقدر ينقل الشمس من مدار لمدار.. جيش ذكر اسمه يزلزل حصون الأرض ويخلى قلوب العدو تنهار.. تمن سنين باحارب عشانك وعشان سلطنة والدك وكل الممالك اللي بتجمعنى بيهم صلة قرابة.. وفى كل حرب باحفر بدم جيوشى علامات انتصار.. والنهارده .. جى بأمد لك ايدى بكل بساطة عايزه ترفضها!!.

ذهب : الجواز مش موقعه حربيه جاي تكتب فيها بدم البكارة انتصارك.. وقلبى مش قلعة هزيلة جاي تدهسها بجيوشك.

حرب : (يهجم عليها ويمسك ذراعها بعنف فتتخلص منه وتبتعد فى تحد) اوعى تفتكرينى بسهولة حاسلم.

دهب : كتر شرب الدم طرطش فوق ضميرك .. فرغ كيائك
م العواطف النبيلة .. شرخ الإحساس فى قلبك .. وغير
نظرتك لأقرب ناس إليك .. أنت ما بقتش أنت لأ ..
للأسف .. أنت بقيت شخص تانى .. شخص متهور
أنانى .. وأنا مش حاقولك أكثر م اللي أنا فى أول كلامى
قلتهولك !! .

حرب : يعنى مصرة يا أميرة ؟ .

دهب : ايوه مصرة .. وكل ذرة فى جسمى رفضاك يا ملك .

حرب : (يهجم عليها ويحاول اغتصابها بينما هى تقاوم
وتصرخ وتستغيث)

اللى عايزه حرب الجيران لازم يكون .. بالمحايلة ..
بالرضا .. بالقبول .. بالعنف .. بالسيف .. بالجنون .. لازم
يكون .

دهب : (تتخلص منه) اوعى إيدك سيبنى (تصرخ) ~~~~~

السلطان : (يدخل متجها إلى ابنته) إيه يا بنتى إيه فى إيه؟

(ينتبه إلى وجود حرب) حرب! إيه اللي جابك؟

حرب : حقى .

- السلطان : انت ما لكش عندنا أدنى حقوق.
- ذهب : جى عايز يغتصب قلبى بأحط الأسلحة.. بالشراسة
والهمجية وبشرع الغابات.
- السلطان : هى حصلت.. والله لولا عامل حساب لأخويا اللى
مات.. كان بقى لى معاك تصرف تانى يا أخس
المخلوقات.. امشى واخرج بره قصرى.
- حرب : عمى.. انت عارف بتقول إيه !؟
- السلطان : وأنت اللى حتعرفنى يا عرة الملوك!!
- حرب : يبقى استعداد من النهارده للى جى (يخرج).
- السلطان : (منادياً) يا وزير.
- الوزير : (يدخل) أمر مولاي.
- السلطان : (لذهب) روحى انتى دلوقتى يا ذهب.
- ذهب : أمرك يا والدى (تخرج).
- السلطان : حرب الجيران بيهددنى يا وزير.
- الوزير : لسه ما اتخلقش اللى يهدد مولاي السلطان نعلان.
- السلطان : والحل يا وزير!.. دبرنى.. الواد متهور وممكن يهجم
علينا فى أى وقت.

- الوزير : يبقى ما فيش غيره.. الملك أوسكارو يا مولاي.
- السلطان : برافو عليك.. اطلبهولى.
- الوزير : زارجى.. اطلب الملك أوسكارو على شبكه الأوسكارنت.
- (يقوم الزارجى بلمس مجموعة من الأزرار أسفل الشاشة فتظهر على الشاشة صورة الملك أوسكارو جالساً وحوله مجموعة من الفتيات)
- أوسكارو : خير يا سلطان نعلان!.
- السلطان : وحييجى منين الخير يا ملك أوسكارو.. حرب الجيران بيهددنى.
- أوسكارو : ده موضوع خطير وأكبر من أنه يتناقش على الشبكة.. أنا جايلك بنفسى.
- فتاه ١ : (تحمل مجموعة من الدوسيهات وتقترب من أوسكارو) تقارير المخترعات الحديثة اللي عظمتك أمرت بيها لرفاهية وسعادة الشعوب.
- فتاه ٢ : (تحمل مجموعة من الخطابات وسنبلة قمح) الشعوب الجعانيين خالص والشحاتين خالص طالبين المعونات

الاوسكارية.. وعايزين يشوفوك خالص.. وبيقولوا
لو شافوك حيشبعوا خالص خالص خالص.

أوسكارو : مُنْ مُنْ.. ابقى فكرينى اعمل لهم زيارة.

كباشان : الله يكون فى عونك يا ملك أوسكارو.. شايف يا مولاي
بيتعب ازاي.. عامل زى الطور.. شايل كل هموم العالم
على قرنه.

أوسكارو : ما بانامش وحياتك يا وزير كبشان.

السلطان : ربنا يقويك ويخليك لينا.

فتاه ٣ : (تحمل فى يدها غصن زيتون) الشعوب الوحشين اللى
بيموتوا بعض بيستنجدوا بعظمتك يا راعى السلام
وحامى حمى العالم.

أوسكارو : مُنْ مُنْ.. ابقى فكرينى أزود المساحة المخصصة لزراعة
الزيتون وبالمرّة نضاعف أبراج الحمام.

كباشان : شايف قلبه الطيب يا مولاي.

أوسكارو : انا مش عارف حاعمل إيه ولا إيه عبء كبير يا سلطان
نعسان.

السلطان : واضح انك مشغول وما عندكش وقت! .

أوسكارو : كلام إيه اللي بتقوله ده يا سلطان نعلان.. ده أنت
اخويا وحبيبى.. واللى يرشك بالميه أرشه بالدم..
اطمئن.. أنا حابعت لك النسخة الكربون.

السلطان
والوزير : واحنا فى انتظار النسخة الكربون.

اطلاؤ

المشهد الرابع

مملكة استعمارينا

(قاعة اجتماعات الملك أوسكارو)

(حيث نجد فى صدر القاعة طاولة اجتماعات على شكل نجمة سداسية بيضاوية الرأس، وعند كل رأس كرسى لأحد الاعضاء وهم : شكنو.. سفرو.. هيرتو.. شرو.. جيتو.. وهم يظهرون فى صورة أقرب إلى صورة الإنسان البدائى أو آكلى لحوم البشر.. ونلاحظ أن شكنو هو الذراع الأيمن لأوسكارو.. كما نرى أن كرسى أوسكارو مميّز عن كراسى باقى الأعضاء من حيث الحجم والفخامة.. يضاء المسرح فنسمع صوتاً نسائياً يتحدث عبر مكبرات صوتية موزعة على جدارن القاعة)

ص . نسائي : الساعة الآن الواحدة وعشر دقائق وعشرين ثانية.. حان وقت الإجتماع..

(يدخل كل من شكنو وسفرو وهيرتو وشرو وجيتو، يتجه كل منهم إلى كرسيه ويجلس فى صمت)

الملك أوسكارو ملك مملكة استعمارىكا.

(يدخل الملك أوسكارو فيقفون جميعاً)

أوسكارو : (يجلس على كرسيه مشيراً لهم بالجلوس) اتفضلوا

اقعدوا (يهمون بالجلوس).. جيتو.. استنى انت

ماتقعدش (يظل جيتو واقفا بينما يجلس باقى

الأعضاء).

شكنو : الأعوان ببسألوا عن سر الاجتماع المفاجئ يا كبير

الأعوان.

أوسكارو : الأعوان!.. هم فين الأعوان دول؟! (تحدث همهمة

بين الجميع) الأعوان يا شكنو اتعلموا الكسل

والتواكل.. باعوا القضية (منادياً) كوكتيل ٤٨.

ص. نسائي : أمر كبير الأعوان .

أوسكارو : يعاقب جيتو بالتجميد من الحالة واحد للحالة سبعة لمدة ٤٥ ثانية.

ص.نسائي : علم وينفذ (ومضات وأصوات متقطعة مع إمكانية خروج دخان من تحت قدمي جيتو الذى يظل ساكناً دون حركة حتى تنتهى مدة التجميد).

أوسكارو : تقدروا تقولولى ازاي حنقدر نسيطرع المريح واحنا ماانتهيناش من السيطرة الكاملة على الكرة الأرضية!!.

سفرو : ازاي يا كبير الأعوان.. الكرة الأرضية انتهت من زمان.. ولغاية دلوقت مسيطرين على ٧٠٪ من سكان المريح.

أوسكارو : لكن لسه فيه مدينة فى الكرة الأرضية مش قادرين نسيطر عليها.

شرو : وتطلع إيه المدينة دى يا كبير الأعوان؟.

أوسكارو : قولهم يا شكنو.

شكنو : مدينة سلامكا.. لسه عايشة فى سلام وأمان وما فيش فى حكامها مرتشى ولا خاين ولا عميل.. وشعبها بيشتغل بتفانى وحب.

أوسكارو : سامعين اللى أنا سامعه.. إزاي المدينة دى تفلت من

ايدينا.. إزاي؟!!

شكنو : اهدى يا مولاي أنت عندك البواسير.

أوسكارو : بواسيرى فدا استعمارىكا.. (الجميع يصفقون)..

بتصقفوا على إيه؟ على خيبتكوا.. ما ترد يا سفرو..
فهمنى.

سفرو : أنا حاعمل إيه.. اللى مسئول عن عدم سيطرتنا على
المدينة دى.. هيرتو.

هيرتو : إحنا حانبندى نذنب فى بعض ولا إيه!.

سفرو : إن جالك الطوفان يا صاحبي.. كل واحد يشيل شيلته.

هيرتو : يعنى إيه؟

سفرو : يعنى أنا مرحلتى بتبدأ بعد مرحلتك.. أنت بتخش

تقضى على الأخلاق وأنا بعدك.. أدمر الاقتصاد

ص.نسائى : مولاي الملك أوسكارو.. مدة التجميد لجيتو انتهت..

نديله مدة تانية؟

- أوسكارو** : لأ.. كفاية عليه كده.. يرجع للحالة واحد.
- ص.نسائي** : علم وينفذ (يعود جيتو للحالة الطبيعية ويجلس على كرسيه).
- أوسكارو** : خش فى الموضوع يا هيرتو.. مدينة سلامكا ليه لغاية دلوقتى مش قادرين نسيطر عليها؟.
- هيرتو** : دى مدينة غريبة يا كبير الأعوان ... صدرنا لهم شرايط ومجلات من اللى بالى بالك..حرقوها فى ميدان عام.. صدرنا لهم أطنان مخدرات ببلاش علشان يشربوها.. خدوها واستخدموها فى صناعة الأدوية.. حتى الشباب اللى فى سن المراهقة تصور بيتحدونا!.
- أوسكارو** : بيتحدونا إزاي ؟
- هيرتو** : عمالين يقروا ليل نهار وعارفين كل حاجة عن تراثهم وتاريخهم.. ورفضوا إنهم يطولوا شعرهم ويقلدوا فرق الهيبز والمطربين المخنثين اللى إحنا صارفين على دعايتهم دم قلبنا.. دول شعب غريب.. خربوا بيتنا الله يخرب بيوتهم.

أوسكارو : مادام بيحبوا القراية خشولهم من السكة دى.. ابعثوا لهم كتب تشكك فى العقيدة.. كتب عن الوجودية.. عن الشيوعية.. عن عبدة الشيطان.

هيرتو : مين قال إننا ما بعتناش.. بعتنا.. وكل ما نبعت أكثر يتمسكوا بإيمانهم أكثر واكثر.

شكنو : فعلا يا مولاي.. التقارير بتقول إن كل ده حصل.

أوسكارو : حاولوا مع المسئولين.. مع الملك.. فهموهم إن الكراسى اللي قاعدين عليها مالهاش أمان.. قولوا لهم إن شعبهم ملعون.. وإنهم لازم يأمنوا مستقبلهم ويهربوا فلوسهم لبنوك سوسو.. فين عبقريتك يا سفرو.

سفرو : فلوس إيه اللي يهربوها.. ده كل مسئول ما يملكش غير مرتبه.

أوسكارو : شوفوا البلطجية والصيع والحرامية.. ابعثوا لهم أسلحة واعملولهم غسيل مخ.. فهموهم إنهم أحق بالسلطة.. قولولهم إننا وراهم لحد ما يوصلوا للعرش.

شكنو : أهو ده اللي مش ممكن يا مولاي.. لأن سلامكا هي المدينة الوحيدة اللي فيها الحرامى بيتوب قبل مايسرق.

أوسكارو : إزاي الكلام ده ؟!

هيرتو : ملك سلامكا عامل يوم فى الشهر مسميه يوم
الأمنيات.. وفى اليوم ده.. كل واحد من الرعية
أو المسئولين له أمنية.. الملك بيحققها له.

أوسكارو : مهما كانت ؟

هيرتو : مهما كانت.. حتى ولو كانت قصر.

أوسكارو : وخزانة المملكة بتكفى كل أمنيات الرعية؟!.

شكنو : وبتفيض يا مولاي.

أوسكارو : طب إزاي.. أفهم.. أموال مدينة سلامكا قد أموال
مدينة لعبكها.. وعدد الرعية هو نفس العدد.. ومع
ذلك ٩٥٪ من رعية لعبكها مش لاقيين ياكلوا.. ده غير
أن خزانتهم فاضية ومديونين!.

سفرو : ده لأن ٥ ٪ من رعية لعبكها كلهم مسئولين..
وبيسرقوا ٧٥ ٪ من ميزانية المدينة.. والدليل على كده
حساباتهم اللي فى بنوك سوسو.

- أوسكارو : يعنى إيه.. يعنى سلامكا دى مالهاش حل؟!!
- شرو : ده حتى العلماء بتوعهم أمرهم غريب.. جيتو خطف من عندهم أربع علماء.. وطبعاً جابهم لى عشان نجند خيراتهم لحساب استعمارىكا.
- أوسكارو : برافو يا شرو.. وقدرتوا تستفيدوا منهم؟
- شرو : مع الأسف رفضوا يتعاونوا معانا أو يدونا أى معلومات وفضلوا الانتحار.
- أوسكارو : يعنى إيه؟.. بتقفلوها.. أوسكارو ما يعرفش الفشل.. (منادياً) كوكتيل ٥٦ .
- ٣ أصوات : أمر مولاى.
- أوسكارو : يعاقب سفرو وهيرتو بذبذبات ضغط على من الحالة واحد للحالة تمانية
- ٣ أصوات : علم وينفذ.
- (يرتعبش كل من سفرو وهيرتو ويصرخان لإحساسهما بسريان تيار كهربائى عبر كراسيهما).

أوسكارو : الشغل ده ما ينفعنيش.. مش استعماريكا اللي يحصل فيها الكلام ده.. اليوم اللي ما يقدمش خطوة فى أحلام أوسكارو ما يتحسبش.. عاملين لى كبار وبتتناقشوا.. إنتو نسيتموا أصلكوا ولا إيه.. دا انتو حتى ما لكوش أصل.

شكنو : مالوش لازمة الكلام ده يا مولاي.. ما الحال من بعضه.

أوسكارو : الحال من بعضه آه.. لكن أنا كنت زعيم عصابة.. إنما انتو كنتوا شوية لمامه.. اللي كان خدام.. واللى كان بيتاجر فى شوية حاجات مالهاش لازمة... واللى كان معاه سحتوتين بيطلعهم بالريا.. واللى كان فاتح ماخور وبيتاجر فى الضعف الإنسانى.. واللى واللى ولا انتو فاكريني نسيت!!

شرو : لا.. بس أنا كنت محترم.

أوسكارو : محترم يا ابن المعفنة.. دانت كنت صبى فى معمل طرشى.. ودلوقتى فى معمل برضه.. لكن فى معمل أبحاث.. وياريتك فالح.

شرو : وانا قصرت فى إيه ؟ دا أنا مخلى كل شعب
استعماريكا بيشتغل ١٨ ساعة وبيقرا خمس ساعات ..
وينام ساعة.. وياريتهم بيناموها.. ده أوقات بيشتغلوها
أوفر تايم.

أوسكارو : إيه الفائدة.. فين النتيجة.. الأجهزة الحديثة اللي
المفروض تتسلم للسلطان نعان من أسبوع.. تقدر تقول
لى ما خلصتش ليه لغاية دلوقتى يا شرو.

شرو : كنا بنجرى تجارب على الصاروخين الجداد.. مايلك
فاكسون أرض جو ومادوسنا م. ش.. ده غير إن براميل
المفاعل النووى كانت بتنفس.. ومع ذلك الأجهزة
المطلوبة حاتكون جاهزة خلال ٤٨ ساعة.

أوسكارو : كتير.. قدامك ٢٤ ساعة بس.

شرو : أمرك يا مولاي.

أوسكارو : كوكتيل ٦٧ .

شرو : لأ.. بلاش كوكتيل ٦٧.

- ص.رجل
مخنث : أمر كبير الأعوان.
- أوسكارو : يعاقب شرو بالبواسير سرعة ١٥ لمدة ٧ ثواني.
- كوكتيل ٦٧ : علم وينفذ .
- (يقف شرو ويجلس على كرسيه كأن شيئاً ما يخرج
من الكرسي إلى مؤخرته)
- شكنو : (يهمس في أذن أوسكارو) جيتو عاوز يقول حاجة.
- أوسكارو : أيوه يا جيتو.. اتفضل.. عايز تقول إيه ؟
- جيتو : أقدر اعرف إيه سبب عقابي؟.
- أوسكارو : قصدك تعرف إيه سبب خيبتك.. إحنا يا جيتو
بنواجه حرب خفية بسببك.
- جيتو : بسببي أنا ؟
- أوسكارو : أيوه بسببك.. فيه جواسيس دخلوا مدينة الذهب..
وانت ما عندكش أى فكرة عنهم.. قوله أساميهم
يا شكنو.

شكنو : الحكيم نبهان وإبنة عمران وبنته شمس الزمان.

أوسكارو : وطبعا أنت عارف مدى خطورة وجودهم فى المدينة..
عارف ولا تحب أقولك.. أقولك عشان تفرح قوى وتنام
فى العسل أكثر ما انت نايم.. نبهان عمل ورشة
لتصنيع الذهب فى قصر السلطان نعلان وشغل ناس
معاه.. ومش ناقص غير ان العدوى تستشرى فى كل
أهل المدينة.. والسلطان يحس بقيمة الذهب اللى
عنده.. وعمران الواد الحليوة المسمم.. قدر يوصل
لقلب الأميرة ذهب بنت السلطان.. مش كده وبس.. ده
عرّانا قدامها.

الجميع : عرّانا !

أوسكارو : أيوه عرّانا.. وكشف لها كل اللى بنفكر فيه واللى
حنفكر فيه.. يعنى بدأوا السيطرة على عنصر مؤثر فى
القصر.. ده غير انهم اتعاملوا مع الزنان على انه
عاقل.. وخلّوه يرجع يزن بعد ما كل المدينة اتهمته
بالجنون وكنا قربنا نخلص منه.. وشمس الزمان.. بقت

من أقرب المقربين للأميرة ذهب وإذا كانت مبهورة فى الوقت الحالى بالمدينة.. ما افتكش ان الحالة دى حتدوم.. ومسيرها تفتّح عيون الأميرة على حاجات كتير.. والأميرة تفتّح عيون السلطان على حاجات أكثر.. كفاية كده ولا أقول تانى يا جيتو.

جيتو : هو ما فيش غير جيتو.

أوسكارو : أيوه ما فيش غيرك المسئول عن اللى حصل ده.. يعنى إهمال حشرة زيك.. ممكن يطير من إيدينا الفرخة اللى بتبيض لنا ذهب.

الجميع : (تتداخل أصواتهم) مش ممكن.. وبعدين.. نعمل إيه.. معقول.. والحل.

سفرو : الحل اننا نبعدهم عن سكتنا.

أوسكارو : مش كفاية.

هيرتو : نعمل فيهم زى ما عملنا فى الزنان ونحولهم فى نظر أهل المدينة لمجانين.

أوسكارو : ده موضوع عايز وقت.

- شرو** : نبحث عن سبب غير التكنولوجيا اللي بنصدرها
 للسلطان نعلان وغير حنفيات الأكل.. سبب يخليه
 ما يقدرش يستعنى عننا مدى الحياة.
- أوسكارو** : بدأ مخكم ينصف.. لكن إيه هو السبب ده؟
- شنكو** : حرب الجيران..
- جيتو** : المعلومات اللي عندي بتقول أن العلاقات متوترة بين
 حرب الجيران والسلطان نعلان.
- أوسكارو** : هو ده.. حرب الجيران.. كوكتيل ٩٠.
- ص.نسائى** : أمر كبير الأعوان.
- أوسكارو** : رسالة لعملائنا فى مملكة طربقها يخلوا حرب الجيران
 يطلب مقابلتى فورا.. وأنا جاهز للمقابلة.
- ص.نسائى** : علم وينفذ.
- سفرو** : لكن إيه علاقة حرب الجيران بنبهان وأولاده.
- أوسكارو** : القوة البشرية المتمثلة فى العلم والفكر والطاقة اللي عند
 نبهان وأولاده.. والثروة اللي عند السلطان نعلان..

والإمكانيات والخبرات الحربية اللى عند حرب
الجيران.. لو اتحدوا.. حيبقوا أكبر قوة فى الوجود.

شكنو : أكبر من استعمارىكا !؟

أوسكارو : ومن ألف استعمارىكا.. وهو ده الموضوع الخطير اللى
جمعتكم عشانه.

الجميع : (همهمات) فعلاً.. موضوع خطير.

كوكتيل ٩٠ : الملك حرب الجيران ملك مملكة طربقها بيطلب
المقابلة.

أوسكارو : (باحتقار) خلّوه ينتظر وابعتوله أى حد يستقبله
ويقعد معاه (يصرخ فى الأعوان) ساكتين ليه؟..
ما تفكروا.. إزاي نضرب التلات عصافير بحجر واحد
(تخفت الإضاءة مع نزول الموسيقى المناسبة وتوجيه
الزوم على أوسكارو والأعوان وقد تحولت قاعة
الاجتماعات إلى غرفة عمليات حربية، حيث نرى
أحد جدران القاعة وقد تحول إلى خريطة للعالم يقف
بجوارها أوسكارو وحوله جميع الأعوان يتناقشون
ويتشاورون ويدرسون الخطة بإحكام)

أوسكارو : (وقد انتهى من وضع الخطة) أشكركم.. انتهى
الاجتماع.

(ينصرف الجميع) أمرت للولد حرب الجيران
بالدخول.

صوت : الملك حرب الجيران ملك مملكة طربقها.

ح.الجيران : (يدخل)

أوسكارو : أهلا أهلا بالبطل المغوار والأسد الجبار.

ح.الجيران : أهلا ببيك يا ملك أوسكارو.

أوسكارو : عرفت إنك طالب مقابلتى.. خير.

ح.الجيران : عمى السلطان نعلان رافض يجوزنى بنته.. أنا عارف
مدى الصداقة اللى بينك وبينه.. وعشان كده جيت
لك.

أوسكارو : وأنا بإيدى إيه !

ح.الجيران : بإيدك إنك تتدخل وتقنعه إنه يوافق ويلتزم بالاتفاق
اللى كان بينه وبين والدى.

أوسكارو : جواز بنت السلطان دى مسألة خاصة جدا بالسلطان..
وأنا ما اتعودتش أتدخل فى الأمور الشخصية للسلطان
نعسان.

ح.الجيران : حتى لو الأمور دى حتودى لكارثة!

أوسكارو : السلطان نعسان ده عمك.. وأنت ابن أخوه.. يعنى
اللى بينكم مشاكل عائلية أنا ماليش التدخل فيها.

ح.الجيران : والمصالح اللى بينك وبين عمى!؟

أوسكارو : دى حاجة ودى حاجة.. وإحنا طول عمرنا نعرف إن
حرب الجيران لدهب ودهب لحرب الجيران.

ح.الجيران : ما اعرفش إيه اللى غيرها من ناحيتى فجأة؟

أوسكارو : مش يمكن حد تانى دخل فى الخط!

ح.الجيران : ده أنا كنت أقتله واشرب من دمه.

أوسكارو : وتبقى استفدت إيه ؟ لكن بقى لو انت حاسس إن
دهب من حقلك..

ح.الجيران : (مقاطعاً) طبعاً من حقى.

- أوسكارو : واللى مش طايل حقه بالسلم...
- ح.الجبران : يطوله بالحرب.
- أوسكارو : شكنو.. صور الأميرة ذهب وعمران.. آه نسيت اقولك..
- اللى دخل فى الخط اسمه عمران.
- ح.الجبران : مين عمران ده ؟
- شكنو : (يدخل ومعه الصور ويسلمها لأوسكارو) الصور
يا مولاي.
- أوسكارو : (يبدأ فى عرض الصور على حرب الجبران) دى
صورتهم وهم بيتمشوا.
- ح.الجبران : آه الجبان الندل.
- أوسكارو : ودى صورتهم وهم قاعدين على ضوء القمر والشموع.
- ح.الجبران : يا ويلهم منى.. لازم انتقم منهم.
- أوسكارو : ودى صورتهم وهم..

- ح.الجيران : كفاية.. كفاية (يثور ويصاب بحالة هستيرية ويزأر
كالأسد الجريح) الكلاب..آه.. أنا حاطرق المدينة
على اللي فيها.
- أوسكارو : إهدا يا ملك حرب الجيران.. بالعقل.
- ح.الجيران : مافيش عقل.. فيه قتل وحرق وموت ودمار.
- أوسكارو : مدام كده .. الأسلحة اللي أنت عايزها تحت أمرك..
والسعر انت عارفة.. والدفع عند الاستلام.
- ح.الجيران : أنا مش عارف اشكرك إزاي يا ملك أوسكارو.
- أوسكارو : ماتقولش كده.. ده واجبي.. ده أنا أنشأت هيئات وأمم
لتحقيق العدالة.. ورجوع الحق لأصحابه.

إِظْلَامٌ

المشهد الخامس

مدينة الذهب

(قصر السلطان)

ذهب : معقولة.. بقى شمس اللي كانت طيارة من السعادة
بالمدينة هي اللي عايزه تسيبنا!.

شمس : للأسف يا ذهب.. حاولت أصدق الكدبة.. وأقول أنى
خلاص بقيت واحدة من أهالى المدينة لكن ما قدرتش..
تكوينى وكلام والدى عن قيمة العمل وعن الإنسان..
واللى اتعلمته فى السنين اللي اختلطت فيها دموعى
وضحكى وعرقى وأحلامى بتراب بلدى كان أقوى منى..
الصلابة والعزة والكرامة اللي اتخلقوا جويا ما قدرش
الذهب يمحيهم.. وعشان كدة حسيت بالحنين لبلدى.

ذهب : وأنا اللي فرحت ان بقى لى أخت.. ما تتصوريش أنت
وعمران والحكيم نبهان عملتوا فيه إيه.. حسستونى
بالحب والسعادة والأمان.. غيرتوا نظرتى لكل شئ

حواليه.. خلقتوا الأمل جوايا.. فتّحتوا عينيه على دنيا
أجمل بكثير من الدنيا اللي بقى لى سنين أعرفها.

(عمران ونبهان يدخلان)

عمران : صدقنى يا والدى.. شمس عندها حق.. وأنا معاها فى
أنا نرجع لبلدنا.

نبهان : يا ابنى.. يا ابنى ده أنا بدأت أعلم ناس كتير من أهل
المدينة الشغل وأحببهم فيه.

دهب : عايز انت كمان تسيبنا يا عمران!.

عمران : أيوه يا دهب.

دهب : وهان عليك تقولها!.

عمران : يا دهب أنا حاسس ان أنا السبب فى الأزمة اللي بينكم
وبين حرب الجيران.

دهب : أوعى تفتكر أن ظهورك فى حياتى كان له أى تأثير على
رأبى فى حرب الجيران.

عمران : حرب الجيران عنيد.. ومصر على الإرتباط بيكى.. وانتى
عارفه لو ده ما تمش ممكن الأمور توصل لإيه!

ذهب : حتوصل لإيه.. الحرب !؟

عمران : (صمت)

ذهب : إيه خايف !؟

عمران : أيوه خايف..خايف عليكى يا ذهب لأنى بحبك..
وعمرى ما حبيت حد غيرك.. ومش كتير أنى اضحى
بحبى وسعادتى فى سبيل انك تعيشى انتى وكل أهل
المدينة فى سلام.

ذهب : ماחדش طلب منك إنك تضحى.. نسيت كلامك عن
أهالى المدينة.. والأمل والحلم.. والهدف.

نبهان : عمران.. ذهب محتاجة لوجودنا جنبها النهارده أكثر
من أى وقت تانى.. وما تنساش انت واختك إنها
دافعت عننا ضد الوزير.. واكرمتنا فى قصرها ..
ولاً هو ده رد الجميل!؟.

ذهب : ما تغضبش عليهم يا حكيم نبهان.. أرضنا ما بتحضنش
ناس دراعاتهم مرخية.. ولا مدارين وشهم عنها.. لأنها
ما بتحبش غير اللى بيحبها.. وأنا خلاص.. عرفت أنا

رايحة فين وحاعمل إيه.. ومن دلوقتي حاخرج للأهالى أفوقهم واصحيهم واعلمهم إزاي يدافعوا عن أرضهم.

شمس : دهب (تجرى نحو دهب وتعانقها وبيكيان).

عمران : دهب.. إحنا جايين معاكى ومش حنسيبك.

نبهان : هم دول ولاد نبهان.. يلا بينا ما تضيعوش وقت.

(يخرج الجميع بينما يدخل السلطان والوزير)

السلطان : مافيش أخبار من الملك أوسكارو.

الوزير : النسخة الكربون على وصول يا مولاي.

الحاجب : النسخة الكربون للملك أوسكارو.

السلطان : خليها تتفضل بسرعة.

النسخة الكربون : (يدخل وخلفه قائد حرس كاوكاو وهو رجل ضخم

الجثة وحوله مجموعة من الفتيات يلبسن شورت

كابوى وتى شيرت قصير إلى حد ما وهم يمثلون حرس

كاوكاو.. أما النسخة الكربون عبارة عن الملك أوسكارو

بالإضافة إلى حامل ملفات.. هيكل حديدى لة ثلاثة
أذرع ومقوس من الداخل بدرجة تتناسب مع مؤخرة
الرأس.. يرتديه الملك أوسكارو بحيث تقع نهاية
ذراعين منه أعلى الأذنين والذراع الثالث أسفل
الرأس).

صديقى السلطان نعان.

السلطان : صديقى الملك أوسكارو (يتهياً لاحتضانه ولكنه يتوقف

فجأة) لكن أنت مش الملك أوسكارو!

**النسخة السلطان
النسخة :** أنا النسخة الكربون للملك أوسكارو أو نسخة بالكربون
من الملك أوسكارو.

يعنى الملك أوسكارو فيه منه نسختين!!.

: يوجد من الملك أوسكارو عشر نسخ.. ونظراً لأهميتكم

أرسل لكم نسخة من المستوى الأول.. اللى هو أنا..
أوسكارو واحد.

السلطان : إيه اللخبطة دى .. فاهم حاجة يا وزير؟.

الوزير : ولا حافهم يا مولاي.

النسخة : اطمئن يا سلطان نعلان.. سوف لا تشعر بأى اختلاف

بينى وبين الملك أوسكارو.. وهذا يرجع إلى انى مزود
بملفين.. ملف به كل المعلومات المخزنة بذاكرة الملك
أوسكارو.. والملف الآخر لتسجيل كل ما يدور بيننا.

السلطان : فاهم حاجة يا وزير؟.

الوزير : طبعا فاهم يا مولاي.

السلطان : فاهم إيه ؟

الوزير : فاهم إن جلالتك مش فاهم.

النسخة : أمامك ثمان دقائق وعشرون ثانية فدعنا من المهاترات..

انتهى الملك حرب الجيران ملك مملكة طربقها من وضع
خطة الهجوم على المدينة.. وساعة الصفر سوف تكون
خلال الأربع وعشرين ساعة القادمة.

السلطان : أربعة وعشرين ساعة ! والحل.. فين الملك أوسكارو؟.

النسخة : وأنا مش مالى عينيك.. حرس كاوكاو.. أنا لا أستطيع

التعامل مع شخص يحقر من شأنى.

الوزير : اهدى بس يا ملك كربوناتو.. يا أوسكارو واحد.. يا ملك أوسكارو واحد.

السلطان : أنا كلمته ولا جيت جنبه.

النسخة : واضح أن ذاكرتك لا يلتصق بها ما يمر بك من أحداث أو تاريخ أو تجارب أو معلومات.. ربما تكون من النوع التيفال (يضحك) اضحك فإنها دعابة.

السلطان : من غير ما تتريق ولا تغلط قولنا نعمل إيه إذا كنت فعلا زى ما بتقول نسخة من الملك أوسكارو.

النسخة : سنقوم بالسيطرة على الموقف والتصدى لحرب الجيران وحماية المدينة.. وذلك بتزويد مدينة الذهب بحنفية عساكر بعيدة المدى.

السلطان : ومستنيين إيه؟

النسخة : الثمن.

السلطان : اللي انتوا عايزينه بس اتصرفوا.

النسخة : قائد كاوكاو .. العقد.

قائد كاوكاو : أمر مولاي الملك أوسكارو واحد (يقوم بتقديم العقد لكل من النسخة الكربون والسلطان نعيان فيقومان بالتوقيع).

السلطان : بس أرجوكم تنتهوا من المسألة دي بسرعة يا ملك أوسكارو.

النسخة : (لا يرد ولا يتحرك)

الوزير : يا ملك أوسكارو.. يا أوسكارو بيه.. يظهر انه مات يا مولاي.

قائد كاوكاو : الوقت المحدد للملف انتهى.. حرس كاوكاو شيلو الجهاز.

(يقمن الفتيات بحمل النسخة الكربون متجهين للخارج)

إظلال

المشهد السادس

مدينة الذهب

(الساحة)

(ونلاحظ أن ساحة المدينة أصبح بها حنفية ضخمة ذات فتحة واسعة تكفى لنزول شخص أياً كان حجم جسمه.. وهى حنفية العساكر التى قام بوضعها

أوسكارو فى مدينة الذهب)

ذهب : قوموا يا ناس.. فوقوا يا ناس

قوموا افتحوا كتاب الأمل

قوموا امسكوا فى الإيد قلم

ودوروا تروس العمل..

أو اضربوا فى الأرض فاس

شيلوا بندقية إحموا بيها أرضكم

وبعزمكم قوموا ارسموا طريق الخلاص

- عمران** : الدنيا بتجرى شمال ويمين
وانتوا فى سرايركم ليه نايمين
والعالم كله بيتحرك
وازاي لسه ما انتوش فاهمين
- نبهان** : لا انتوا بتصنعوا ولا بتفكروا
ولا ليكوا ملامح وهويه
وكنوز أرضكوا أشكال واللوان
- شمس** : لا بتتقدموا ولا بتعمروا
فى بلدكم وبقيتوا هفيه
فى أواخر الدنيا فى كل مكان
- عمران** : لا انتوا بتزرعوا ولا بتدوروا
فى القلب سواقى الوطنية
ونسيتوا ازاي تحموا الأوطان
- أولاد العجوز** : مين دول يا أميرة ويطلعوا مين
دول مش مننا ولا من جنسنا
ابعدوا عننا يللا يا مجانين

- دهب** : دول هم العقل وهم النور
واللى لسجنكوا حيهدو السور
دول هم ايماننا وضايرنا
وشهادة الحق فى زمن الزور
- نبهان** : مين الإنسان؟
- عمران**
وشمس
نبهان : مين الإنسان؟
- عمران**
وشمس
نبهان : أبو قلب وإيد وجبين عرقان
مين الإنسان
- عمران**
وشمس : اللى بيزرع واللى بيصنع واللى بيبنى..
واللى بيخلق له فى وسط العالم كله مكان
(ينضم الزنان لنبهان وأولاده والأميرة)
- الزنان** : قول تانى كمان وكمان وكمان
صحى ضميرنا يا حكيم نبهان
وانفخ فى الصور
خلى الصرصور
ينقح ويزن على الأموات
- سايب**
ميدانه : أنا جاى معاك (ينضم للزنان)

قافل : وأنا جى معاك
دكانه

رجل ١ : وأنا

رجل ٢ : وأنا

رجل ٣ : وأنا

رجل ٤ : وأنا جاي معاك

(ينقسم الأهالي إلى فريقين فريق يؤمن بكلام نبهان
وأولاده والأميرة، والفريق الآخر لا يتأثر بما حدث،
ومنهم قاعد مكانه و نايم زمانه)

نايم : الناس دى ليه بيزعقوا
زمانه

قاعد : اهو عمالين يتكلموا
مكانه

حاجه غريبة! بياكلوا ويناموا

ولسه برضه عندهم فيه وقت باقى للكلام

نايم : بيقولوا إيه ؟
زمانه

قاعد : كلام كده ما بفهموش ولا حتى عايز افهمه
مكانه

- نايم
زمانه : طب يللا بينا عشان ننام
النوم حقيقى افيد لنا
(يحدث هرج ومرج ومؤثرات توحى بحدوث هجوم
على المدينة.. يفر جميع الأهالي ويولولون كالنساء)
- الأهالى : الحرب.. الحرب.. حيموتونا.. الحقونا.. حرب
الجيران.. يا لهوى .. حنموت..
(يدخل حرب الجيران وجيوشه ويحاصرون الأميرة
ونبهان وأولاده والزنان والمجموعة التى انضمت
إليهم)
- حرب : (يضحك في زهو وانتصار) كل المدينة محاصرة
يا أميرة.. ما فيش مفر.
- ذهب : اللى ابتدى بالشر مش حايجنى إلا شر.
- حرب : لسه بتكابرى.. فاكره نفسك لسه زى ما انتى الأميرة..
انتى خلاص انتهيتى وبقيتى فى إيديه أسيرة.
- ذهب : وقت ما تطولنى إيديك.. مش حاكون غير جثة
مافيهاش أى روح .
- حرب : كل أرواح المدينة بين إيديه.. كلهم أقزام تحت جزمة
قوتى.

- عمران** : مش بطولة لما تتحدى جيوشك شعب أعزل..
ولا تستعرض فنونك ويا ناس مالممش خبرة بالحروب.
- حرب** : انت تخرس خالص.. لسه يا فارس الأحلام دورك
ماجاش.
- نبهان** : يا ملك.. التهور أخرته حسرة وندم.. انتوا أهل..
والأميرة مش غريبة عن جالاتك.. ده مهما كان بنت
عمك.
- حرب** : اللي يجرؤع الإهانة وينسى نفسه.. يعمل حساب اليوم
اللي حايدفع فيه التمن .
- شمس** : شرع الجواز رضا وقبول.. والغصب معناه اغتصاب..
وازاي تقبل على نفسك الحياة مع قلب عمره ما حس
بيك.. ده حتى يبقى حرام.
- حرب** : سكتوها.
- الزنان** : الفخ مرسوم بالمقاس.. وكل طرطور تحته راس.. الحقوه.
- نبهان** : القوه والجيش والسلاح.. للعدو.. مش لأهلك واللى
منك.. ده الزناد لو كان فى إيدك.. الرصاص رايح
لقلبك.. واللى حيموت من جيوشك.. قلبنا هيحزن
عليه.. اعقل وما تفتتش قوتنا وإخوتنا ووحدتنا
وكياننا.. ما تضعفناش قدام عدو سلطانه أقوى مننا..
واقف بيتربص لنا.. بيتمنى موتنا.

حرب : العقل دوره إنتهى.. والكلام دلوقتي للنار والرصاص..

والطريق اللي ابتديته مافيش قوة هتقدر فيه ترجعنى .
(تبدأ الموسيقى ذات الإيقاع الغربى مع نزول جيش
أوسكارو من حنفية العساكر وظهور الملك أوسكارو فى
مستوى أعلى من كل مستويات الواقفين بالساحة)

أوسكارو : (وقد قامت جيوشه بمحاصرة حرب الجيران وكل من
معه) أنا اللي حاقد رجعك.

حرب : أوسكارو !

أوسكارو : ما اقدرش اسيب الطاغية بجبروتة يهدد سلام وأمن أهل
المدينة الطيبين .

حرب : لكن انت قلت مش حتتدخل بينا.

أوسكارو : أنا مش لوحدى.. أنا بانفذ إرادة أكثر من ٣٠ مملكة.

حرب : ماחדش له الحق يتدخل بينى وبين عمى.

(تنسحب الإضاءة مع نزول الزوم على وجهى كل من
حرب الجيران وأوسكارو)

أوسكارو : أنا اللي أقول مين اللي ليه الحق ومين مالوش.. أنا اللي
احدد الحقوق.. واللعبه دى كبيرة عليك ولازم تنسحب
فوراً.

حرب : مش حانسحب.

أوسكارو : لو أصريت ع الحرب دمك يتوزع على كل الملوك.

حرب : هى دى أم المارك.

أوسكارو : يبقى مافيش غيرها.. العاصفة.

(يحدث الاشتباك بين أوسكارو وجيوشه وحرب
الجيران وجنوده مع سماع أصوات مدافع وطائرات..
ويدفع أوسكارو بنبهان وأولاده إلى الخطوط المواجهة
لحرب الجيران - الخطوط الأمامية لجبهة القتال -
مع تغليف المشهد بهذه الأغنية)

قصصوا ريش الطاووس ریحونا من الكابوس

طياراته وقعوها دباباته احرقوها

ترساناته دمرها فوق دماغه طربقوها

قبل ما يفلت زمامه ولا تتساوى الرؤوس

عن مفاعله ازاي سهينا ده فى وجوده خطر علينا

مش حيفلت من إيدينا لو على الجـزمه يبوس

لسه نعسان اللى نايم فى الذهب وبحوره عايم

رجعوه فى فقر دايم واملوا خزائنا فلوس

(تنتهى الحرب.. يختفى حرب الجيران وجيوشه

وشمس الزمان.. يصاب نبهان وعمران.. يظهر السلطان

والوزير)

ذهب : عمران.. سلامتك يا عمران.. مالك يا عم نبهان..

يا وزير يا حراس الحقوهم.. خدوهم بسرعة ع القصر

(يقوم الوزير والحراس بحملهم والخروج.. بينما هى

تبحث عن شمس) شمس فين؟.. شمس.. يا شمس ...

الزنان : شمس اتخطفت يا مولاتى.. خطفها حرب الجيران .

ذهب : النذل الجبان ... يا وزير (تخرج) .

السلطان : أنا مش عارف أشكركم ازای يا ملك أوسكارو.

أوسكارو : تشكرنى على إيه يا سلطان نعلان ده احنا اقرب لبعض
من بعض.. لكن بقى فيه بعض الناس اللي عايز احذرك
منهم .

السلطان : ناس!.. وتحذرنى منهم!.. زى مين ؟

أوسكارو : الحكيم نبهان وأولاده.. هم السبب فى الخلاف اللي
بينك وبين حرب الجيران .

السلطان : لكن دول وقفوا معانا بإخلاص.. وضحوا بحياتهم عشاننا

أوسكارو : كان طبيعى أنهم يعملو كده نتيجة لإحساسهم بالذنب..
والمطلوب منك دلوقت.. حفاظا على سلامة وأمن
المملكة.. تقبض علي نبهان وأولاده وترميهم فى السجن

إخلاء

المشهد السابع

مدينة الذهب

(السجن)

(يدخل أولاد المرأة العجوز بكراسيهم العجيبة يدفعهم من الخلف العبيد ويؤدون هذا الاستعراض فى حركات متناسقة حول هيكل السجن.. والسجن عبارة عن حيوان خرافى أو مجموعة حيوانات خرافية.. ديناصورات ضخمة تخرج من أجسادها إشعاعات ضوئية ترسم على أرضية المسرح شكل أشبه بنجمة داود فتكون الحدود الخارجية لهذا الشكل بمثابة أسوار السجن الذى يقف بداخله الحكيم نبهان وعمران.. حيث نراهم فى حالة عجز عن الخروج أو الاقتراب من الخطوط الضوئية المرسومة.. كما نرى ضوءاً خاطفاً – فلاش – وسماع أصوات صاخبة عند ملامستها، يصاحب هذا المشهد أغنية غربية أو إيقاع الديسكو الصاخب.. كما يمكن أن تعلقو و تهدأ الموسيقى طبقاً لمدلولات الجمل التى ستطرح، والتى ستوحى بتغيير

الموسيقى لتتناسب مع إرهابات الثورة التى سوف تنفجر فى نهاية
المشهد)

(يدخل الوزير وأولاد العجوز ومجموعتهم وقد ارتدى الجميع
تى شيرتات عليها صورة أوسكارو وتحت الصورة بخط واضح بابا
أوسكارو)

الوزير : بابا أوسكارو يا حاميـنا ربنا يخليـك ليـنا .

الأهالى : (يتصدرهم أولاد العجوز يهتفون وراءه)

بابا أوسكارو يا حاميـنا ربنا يخليـك ليـنا.

الوزير : رجعتلنا أراضينا وبقيتى حرة يا مدينة.

الأهالى : رجعتلنا أراضينا وبقيتى حره يا مدينة.

(يخرج الوزير والأهالى وهم يهتفون ليجوبوا باقى

شوارع المدينة)

عمران : شايف يا والدى.. شايف أهل المدينة اللى كنا هنموت

بسببهم.. لسه بيهتفوا باسم أوسكارو.. واحنا نترمى

فى السجن.. وشمس تبقى أسيرة فى طبقها..

يا خساره

نبهان : ما تندمش ع المعروف يا عمران.. احنا عملنا اللي كان واجب يتعمل واللى إنسانيتنا فرضت علينا إننا نعمله.. أما اللي حصل لنا بعد كده فده قدر من الله سبحانه وتعالى.. بسم الله الرحمن الرحيم "قل لن يصيبنا إلا ما كتب الله لنا " صدق الله العظيم.

عمران : ونعم بالله.. لكن دول ما بيتأثروش بأى تجربة تمر بيهم حتى الحرب.. أول مره أشوف ناس بيدفعوا تمن احتلالهم.. مش ممكن يكونوا دول بنى آدميين.

نبهان : الإنسان جواه كل الصفات الطيبة وكل الصفات الخبيثة.. الخير والشر.. الإرادة والعزم والإصرار.. والخوف والكسل والخمول.. الشجاعة والابتكار والذكاء.. والجبن والروتين والغباء.. الكرامة والحريّة والثورة.. والذل والسلبية والخضوع.. وهو لوحده بس اللي يقدر يحدد هو عايز يبقى إيه.

دهب : (تدخل) عمران.. أنا آسفه يا حكيم نبهان.. مش عارفة اقولكم إيه.. لكن أوكد لكم إن سجنكم مش حيطول.

- عمران** : ما فيش أخبار عن شمس ؟
- دهب** : شمس بخير.. وأنا باعمل كل اللي أقدر عليه علشان ترجع .
- نبهان** : يا ترى إنتى عامله إيه يا بنتى؟!
- دهب** : شمس دى اكثر من اختى ومن غير ما اوعدكم صدقونى.. شمس حترجع وانتوا حتخرجوا.. لأن أنا قلت لوالدى على كل أساليب أوسكارو الحقيرة.. وكلها مسألة وقت والسحابة اللي حوالين السلطان تروح.. وعيون السبطان تشوف الحقيقة زى ما أنا شايفها.
- (يدخل الزنان متزعماً مجموعة من الأهالى التى انضمت إليه وهو يهتف)
- الزنان** : يا سلطان اصدر فرمان بالافراج عن نبهان.
- الأهالى** : يا سلطان اصدر فرمان بالافراج عن نبهان
- الزنان** : يا سلطان اصدر فرمان بالافراج عن عمران
- الأهالى** : يا سلطان اصدر فرمان بالافراج عن عمران

(يدخل الوزير وأولاد العجوز وهم يهتفون بحياة
أوسكارو فتتداخل أصواتهم مع أصوات الزنان
ومجموعة)

الوزير : (وقد تبين أن الزنان ومجموعة لا يهتفون باسم

أوسكارو) استنوا (للزنان) انتوا بتقولوا إيه؟

الزنان : يا سلطان اصدر فرمان بالافراج عن نبهان .

الأهالي : يا سلطان اصدر فرمان بالافراج عن نبهان.

الوزير : يا قائد الشرطة.. يا حراس.. اقبضوا على الزنان وكل
اللى معاه .

(يهم قائد الشرطة والحراس بتنفيذ الأمر فتتدخل
الأميرة ذهب)

ذهب : استنى يا قائد الشرطة .

ق.الشرطة : أمر مولاتى .

ذهب : عايز تقبض عليهم ليه يا وزير؟ .

الوزير : مش سامعة يا مولاتى بيقولوا إيه !.

ذهب : ببيعبروا عن رأيهم زى انت ما عبرت عن رأيك وهتفت باسم أوسكارو.

الوزير : لكن يا مولاتى اللى بيقولوه ده ضد إرادة مولانا السلطان.

ذهب : إرادة مولانا السلطان ولا إرادتك انت وأوسكارو.. يا ناس.. أوسكارو مش هو اللى حارب ولا هو اللى دافع عننا.. اللى وقف ضد حرب الجيران وجيوشه هو الذهب.. الذهب اللى ضيعناه من إيدينا من غير مانعرف قيمته.. والحقيقة اللى لازم تعرفوها.. بعد ما كنا أغنى مملكة أصبحنا دلوقتى مديونين.. نتيجة للفواتير اللى اتسدت لأوسكارو.. وحنفيات العساكر اللى اتبنت قبل الحرب وبعد الحرب.. وما فيش حل قدامنا غير إننا لازم نفوق.. يمكن نعوض شىء من اللى راح.

الوزير : (يخرج جهاز لاسلكى) آلو.. أيوه يا ملك أوسكارو.. لازم تحضر للمدينة فوراً.. مش حاعرف اشرح لك.. أيوه لازم تيجى انت بنفسك.

- الزنان : أوسكارو هو اللي ورا سجن الحكيم نبهان.
(يبدأ أولاد العجوزه ومجموعتهم فى الانضمام إلى
مجموعة الزنان)
نبهان : سجننا أرحم كثير من سجنكم
الأهالى : سجننا !
عمران : أوسكارو ساجن عقلكم
أوسكارو ساجن فكركم
أوسكارو حولكم دُمى
فتح عيونكم ع العمى
ساجن طموحكم .. حلمكم ..
وساجن الإنسان الحر جوه منكم
دهب : أوسكاروا ده أفعى بمليون وش
وبيتلّون مع كل زمان
وصديق ليناع الزور والغش
أوسكارو عمره ما كان إنسان

ببمصمص خيرنا ودهبنا
وبكل وسيلة بينهنا
وعامل آل إيه إنه صاحبنا
وفى لحظه يبيعنا مالهنش أمان
خلانا كسالى بقى لنا سنين
تايهين مش عارفين فين رايعين
نسانا ان احنا بنى آدميين
ولينا هوية ولينا كيان
أوسكاروا عمره ما كان إنسان

نبهان : ساجن طموحك.. حلمك..

وساجن الإنسان الحر جوه منكم
غيب شمس الحب فى بحور السواد
داس ع النفوس والقلب بإيديه الشداد
ودفن جنين الجهل فى بطون أرضكم
لجل ما تولد كل أنواع الفساد

عمران : فوقوا انفضوا من فوقكم عبايات الخمول

الدنيا ما اتخلقتش ابدأ للكسول

اتكوّنوا من تانى فى رحم الحياه

واتخلّقوا إنسان ما يحنيش الجباه

الله عليكم لما صوتكم يوم يقول : للشر لأ

الأهالى : (وقد اتحدوا جميعاً) حانقوله لأ

عمران : اللأ.. لأ مش بالكلام

نبهان : اللأ تبقى بالعمل

الجميع : طب والعمل!؟

عمران : تقاطعوا أوسكارو اللعين وكل شئ بيصنعه.. وانتوا

اللى تصنعوا فجركم

نبهان : جيرانكو ياما جنبكم.. من أصلكم ودمكم.. بيكم

حيعلى صرحهم.. وببهم حيعلى صرحكم

ذهب : ذهبنا ليه نضيعه ونحوه سلاح ضدنا

سلاح فى إيد عدونا..

يقوى بذهبنا عننا

يقوى ويضعف عزمنا

الزنان : ونبقى ليه متأخرين..

وكسلانيين.. وخيبانيين..

والخيبة جايه مننا

عمران : أوسكاروا لازم تمنعوه من أرضكم

الأهالى : حانمنعه.. هو وكل من معه..

ولو يرفعوا مليون علم فوق أرضنا..

علمه فى قلوبنا مستحيل راح نرفعه..

حانمنعه.. والعمر لو ضاع مننا..

لجل الوجود كله ما يعرف اننا لينا وجود..

حنضيعه.. حنضيعه

ذهب : اتجمعوا.. مدوا الايديين.. وودعوا النوم والكسل

الأهالى : حنودعه .

أوسكارو : (يدخل فيتجه إليه اهالى المدينة فى تحفن) أهلا
بأهلى وأصدقائى.. أهل المدينة الطيبين.. جاينين
وتاعيين نفسكم.. تستقبلونى كلكم.. للدرجه دى
أوسكارو غالى عندكم .

ذهب : أوسكارو مالهوش أى قيمة عندنا

أوسكارو سوس ملعون بينخر عضمنا

ومن النهارده مالوش وجود على أرضنا

أوسكارو : إيه الكلام ده!.. بقى دى طريقة تقابلوا بيها ضيف
عزیز هنا عندكم.

الأهالى : ضيف تقيل على قلبنا .

أوسكارو : وأنا إيه عملته استحق عليه هجومكم.. ده أنا عملتكم
كتير.. نسيتموا حنفيات الأكل فى الشوارع والبيوت.

ذهب : لكن المحابس عندك انت فى استعمارىكا .

أوسكارو : والتكنولوجيا والرفاهية والتقدم اللى انتوا فيه.. مش
أنا اللى عامله .

ذهب : حولتنا سوق للى شعبك ينتجه.. زرعت فينا العجز
والنوم والتواكل.. وفوق كده قبضت الثمن

أوسكارو : طب والدفاع عنكم وطرد عدوكم!

ذهب : حطمت بيه قوة وجودها كان بيهددك.

أوسكارو : معقولة بعد رعايتي ليكم وآخرة وقوفى جنبكم..

بالشكل ده يكون ردكم .. انتوا أكيد بتهزروا

(يقوم الزنان والأهالى والأميرة ذهب بالهجوم على

أوسكارو وجنوده وقذفهم بالحجارة وهم يؤدون هذا

المقطع أداءً حماسياً مع اندماج نهاية اللحن والنصف

الأخير من موسيقى أغنية زهرة المدائن)

الأهالى : أهل المدينة اللي انت ماصص دمهم

أهل المدينة اللي مغيب عقلهم..

اتغيروا.. اتفجروا

مابقوش خلاص بيهزرو

بقوا نار على المحتل..

وطوفان مرارة وغل

لكل مستغل.. خير أرضهم .

(يضاء المسرح بعد انتهاء انتفاضة الأهالى فلا نجد
سوى أوسكارو ومجموعة وقد اصبوا جميعاً نتيجة
لهجوم الأهالى عليهم.. دخول السلطان)

السلطان : إزاي يحصل كده يا وزير.. لا دى فوضى.. ده إهمال
وتسيب.

الوزير : ماقدرتش اقف فى وش الأهالى يا مولاي .

السلطان : يعنى إيه ! الملك أوسكارو أعز أصدقائى يحصل له كده!

الوزير : أصل مولاتى الأميرة ذهب كانت معاهم.

السلطان : طب اسكت.. اسكت.. أنا آسف يا ملك أوسكارو.

أوسكارو : آسف ! أنا الملك أوسكارو ملك مملكة استعمارىكا
يتعمل فيه كده!.. وفى الآخر يتقال لى آسف..
أنا يا سلطان خيبان.

السلطان : واضح أن أعصابك تعبانه (للووزير) ما تروح تهديه.

الوزير : إهدا يا أوسكارو بيه .

أوسكارو : إبعد عنى.. اخص عليك وعلى اللى عملك وزير.

- السلطان : لا ده انت زودتها قوى .
- أوسكارو : إسمع..لازم تسلم كل الإرهابيين اللي فى المدينة فوراً.
- السلطان : مدينة الذهب ما تعرفش الإرهاب.
- أوسكارو : واللى اتعمل فيّه ده إيه ! لازم يتسلموا فوراً وعلى رأسهم نبهان وعمران.
- السلطان : ونبهان وعمران عملوا لك إيه.. دول مسجونين.
- أوسكارو : أفكارهم هى اللي حركت الناس وحولتهم لإرهابيين ولازم يتحاكموا فى إستعمارىكا.. والمطلوب منك تسليمهم فوراً .. هم وكل العناصر المشتركة معاهم فى الإرهاب.. وإلا حتبقى أنت اللي بتأويهم.
- السلطان : أولاً.. أنا مابأويش الإرهاب.. ثانياً.. لو حد اخطأ من الأهالى فيه سلطان يقدر يحاكمه.. أما اللي بتقوله ده يا ملك أوسكارو.. ده تعدى على سيادة المدينة.
- أوسكارو : ما فيش سيادة إلا لأوسكارو.. لازم تسلمهم .
- السلطان : وانا مش حاسلمك شعره منهم.
- أوسكارو : تبقى بتعادينى .

- السلطان : أنا باعادي الظلم .
- أوسكارو : يظهر ان أنا تهاونت معاكم.. أنا حاوريكم أوسكارو
على حقيقته . (يخرج جهازاً صغيراً ويبدأ التحدث
فيه) من أوسكارو ملك مملكة إستعمارىكا لغرفة
العمليات.. أوامر هامة.
- صوت : أمر كبير الأعوان .
- أوسكارو : اقللوا محابس الأكل الرئيسية وحاصروا مدينة
الذهب.. وافرضوا عليها الحظر.
- صوت : علم وينفذ.
- أوسكارو : امنعوا أى أكل أو أدوية أو ملابس تخش المدينة.
- صوت : علم وينفذ.. فيه مصنع فى مملكة مجاورة فيه
احتمالات انه يورد أدوية للمدينة.
- أوسكارو : يبقى إرهابى.. دمروه.
- صوت : علم وتم التنفيذ.
- (صوت انفجارات)

الظلام

المشهد الثامن

مملكة طربقها

(مكان ما داخل مملكة طربقها أشبه بمغارة أو وحدة من وحدات الجيش، مع إضاءة خافتة تتناسب مع الجو العام للمكان، تجلس شمس فى أحد الأركان، يدخل أحد حراس الملك حرب الجيران ويضع الطعام أمام شمس فتشيع بوجهها عنه)

حرب : كلى.

شمس : مش عايزه .

حرب : كلكم صنف واحد.. مليونين بالضعف لكن راسكوا انشف م الحديد.. لو ما كلتيش النهارده يبقى ده إنذار بموتك .

شمس : موتى أهون من عذابى .

حرب : شئ غريب.. كنت ناوى أنتقم من أخوكى فيكى.. وكل مرة أنوى فيها اقتلك.. حاجه تنزع من جوايا نار الانتقام

- شمس** : وخذت إليه م الانتقام غير الخسارة .
- حرب** : خدت اللى ممكن ياخذه أى قائد يطعنه خنجر خيانة .
- شمس** : تفتكر أوسكارو خانك؟! .
- حرب** : أيوه خائى .
- شمس** : أنت قبله خُنت نفسك.. خُنت أمة كان أملها فيك كبير.
- حرب** : الهزيمة فى جولة مش هى النهاية.. لسه فيه جولات كتير.. حابنى من تانى جيوشى وترساناتى.. وبكرة كل الدنيا تعرف حرب ممكن يعمل إليه .
- شمس** : والأميرة! .
- حرب** : مكتوبالى .
- شمس** : هى ولا مملكتها؟! .
- حرب** : هم الاتنين عندى واحد.. مستحيل اسمح لأى غريب ياخذها منى ويستولى فى يوم على ملك عمى
- شمس** : وأنا.. سجنى حيطول هنا.

حرب : (يقترَب منها وقد بدأ يتأثر بكلماتها محاولاً إخفاء

شعوره) انتى! .. انتى هنا لحد ما تجينى الأميرة.

شمس : وأنا ذنبى إيه.. لسه مش عايز تحس بالحياة.. لسه مش

عايز تشوف الناس بقلبك.. الرصاص والحقد وغرورك

بنفسك.. غلفوا قلبك بقمقم من حديد.. الحياة أبسط كتير

من سجن نزواتك وشهوة الانتقام.. الحياة مليانة بأحلام

اجمل من حلمك فى التوسع على حساب أبرياء.

حرب : اسكتى.

شمس : خايف تواجه نفسك بالحقيقة .

حرب : باقولك اسكتى.

شمس : ممكن تسكتنى فى ثانيه بإشاره واحده من صباغك.. بس

قبل ما تنهى عمري انهى صرخة صوت ضميرك.

حرب : أنا أولى بالزعامة من الجميع.. أنا أقوى يا شمس من كل

الملوك .

شمس : الزعامة فى الزمن ده.. مش للفتوه.. انت وكل الملوك اللى حواليك واللى منك.. كلكم أعضاء فى تكوين شخص واحد.. تلزمه القوة.. وقلب شجاع.. وعقل يقدر ع المناورة والذكاء.. تلزمة إرادة قوية.. وإمكانات ماديته تذل له الصعاب.. والصفات دى كلها مستحيل ابدأ تكون فى شخص واحد.

حرب : لكن القوة أهم

شمس : قوة من غير عقل طيش.

حرب : وعقل من غير قوة عجز .

شمس : ليه ما نتعلمش بس من التجارب.. عيبنا حنعيش عمرنا راكبين دماغنا.

حرب : فوقى للى بتقوليه.. انتى إيه.. نسيتى نفسك.

شمس : ممكن اسكت.

حرب : يبقى أفضل.

(صمت)

حرب : شمس .. اتكلمى .

شمس : كلامى بيزعل جلالتك .

حرب : يا شمس.. كل واحد م الملوك عايش لنفسه.. كلهم هرولوا
لحضن الأعدى.. حتى أوسكارو اللى كان أعدى
الخصوم.. أصبح صديق .. ويمكن أقرب منى ليهم.

شمس : واحنا ليه نديله فرصة.. لامتى حنعيش غربا كارهين
بعضنا والاسم أهل.. ليه إيدينا ما تتحدث!!

حرب : يعنى إيه ؟

شمس : مد إيدك.. روح لهم.. وابدأ بعمك .

حرب : بعد اللى عمله فيّه.. لأ.. إذا كان لابد من الصلح.. يجينى
هو.

شمس : تانى حنضيع فى وقت.. ما انت عارف اللى حاصل فى
المدينة.. والمجاعة اللى الجميع بيعانى منها.. بعد
ما اوسكارو أمر بقفل محابس الأكل اللى عنده.. يا ملك
حرب الجيران.. النهارده عمك فى أشد الحاجة ليك.

إظلال

المشهد التاسع

مدينة الذهب

(قصر السلطان)

(الأهالى يعانون من الجوع وقد بدأ يظهر عليهم الإعياء

الشديد)

الأهالى : جعائين جعائين كلنا جعائين

ماحناش لاقيين ولا لقمة عشان نصلب طولنا

الحنفيات بتنزل جوع
والمعدة بتشكى بصوت مسموع
ماحناش فاهمين إيه الموضوع
ولا إيه اللي حصل واللى جراننا
بعد البغدة والعز سنين
أهو ضاع كل ده وبقينا جعائين
ودهبنا ما يسوى حتى رغيف
متغمس دقه يأكلنا

- رجل ١ : وبعدين يا ناس ما فيش حل للى إحنا فيه..
ده إحنا قربنا نموت من الجوع.
- رجل ٢ : قربنا.. ده احنا خلاص موتنا.
- العجوز : واحنا بإيدينا إيه .
- رجل ٣ : نروح للسلطان .
- امراة : والسلطان بإيده إيه .
- رجل ٣ : بإيده إنه يأكلنا.. مش هو اللى كان بيأكلنا.
- الأهالى : أيوه مش هو اللى كان بيأكلنا .
- الوزير : (يدخل) لا مش هو اللى كان بيأكلكوا.. اللى كان بيأكلنا
كلنا أوسكارو.. أوسكارو اللى انتوا حدفتوه بالحجارة..
عارفينه ولا نسيتهو.. أدينا كلنا جوعنا بعد ما غضب
علينا.. استريحتموا!.
- الأهالى : احنا ما نعرفش أوسكارو.. احنا نعرف السلطان..
والسلطان هو اللى مسئول عننا.

السلطان : أيوه السلطان هو المسئول عنكم.. لكن للأسف السلطان كان مخدوع زيكم.. لأنى ما عملتش حساب إن حيبجى يوم تحتاج فيه المدينة لعرق كل واحد منكم.. فكرت انى باريحكم لما أصدر فرمانات بعدم الشغل.. وخليت كل اعتمادنا على أوسكارو.. لكن للأسف.. آدى النتيجة.. كلنا جعنا حتى أنا.. وعشان كدة لازم نفكر كلنا ونلاقى حل.

الوزير : يا مولاي.. ما عندناش وقت للتفكير.. المدينة كلها حتموت م الجوع.. وما فيش قدامنا غير أوسكارو.

السلطان : تانى أوسكارو يا وزير.

الوزير : صدقنى يا مولاي.. هو ده الحل الوحيد.. لازم نروح لأوسكارو ونستسمحه ونترجاه لحد ما يرضى عننا ويرجع الأكل تانى فى الحنفيات .

السلطان : نصبر على الجوع يا وزير لحد ما نلاقى حل تانى غير أوسكارو.

رجل ٣ : إحنا ما نقدرش نصبر أكثر من كده.. حتموت من الجوع

الوزير : يبقى نروح لأوسكارو.

الجميع : نروح لأوسكارو.

الزنان : تانى حنرمى نفسنا فى حضن الخراب.

عمر التعالب والغنم ما يكونوا إخوات أو صحاب.

فتشوا جواكوا عن إنسان جديد.

ما يكونش كسلان أو بليد.

فجروا نبت الحياة فى أرضكم.

هزوا عناقيد السحاب.

وما تعصروش عنب الضمير..

وتقدموه قربان على مذبح شرفكم للذئاب.

الوزير : ماتصدقوهوش.. ده مجنون.. عايزكم تموتوا من الجوع..

صدقونى يا ناس.. ما عندناش.. وقت وما فيش قدامنا غير

أوسكارو.

الجميع : نروح لأوسكارو (بهم الجميع بالخروج).

(تدخل) هو ده اللي عايزه أوسكارو.. عايزكم تركعوا تحت رجليه وبزلكم.. عايزكم دايماً محتاجين له.. عايز يتحكم فيكم بكل الطرق والوسائل.. عايزكم كلكم تفضلوا أقزام.. وهو العملاق الوحيد فى وسطكم.. عايزكم أطفال بتحبوا تحت رجلين بابا.. بابا أوسكارو.. اللي بيمنح الأكل وقت ما يبقى راضى عنكم.. ويمنع الأكل وقت مايغضب عليكم.. بابا أوسكارو اللي بيعملكم المشاريع اللي هو عايزها.. واللى بيبنى بيوتكم على ذوقه.. ويلبسكم ويعلمكم ويسمعكم موسيقى على ذوقه.. حتى القانون اللي بتحكموا بيه من صنع أوسكارو.. تقدرُوا تقولوا كام واحد فيكم اتعلم يقرا ويكتب لغة المدينة.. للأسف كلكم متعلمين لغة أوسكارو.. فين انتم.. فين هويتكم.. ملامحكم.. تاريخكم.. تراثكم.. فين آدميتكم.. يوم ورا يوم مسخكم أوسكارو.. حوّلكم لتماثيل.. تماثيل عاجزة حتى عن حل اى مشكلة تقابلهم.. فوقوا يا ناس.. لازم نعتمد على نفسنا.. على ايدينا.. على جهدنا.. عرقنا.. فكرنا.. لازم نحطم التماثيل اللي جوانا.. ونفوق .

الأهالى : الكلام حلو يا سمو الأميرة.. لكن احنا جعانين وعائزين حل.

دهب : الحكيم نبهان وابنه عمران.

الأهالى : (همهمات)

السلطان : نبهان وعمران !

الوزير : وهو الحكيم نبهان معاه أكل يكفى كل اهل المدينة.

دهب : معاه اللى اغلى من الأكل يا وزير.. معاه العقل والعلم

والعمل.. معاه خبرة وحكمة السنين.. معاه أسرار الزراعة والصناعة والبناء.. ومعاه مفاتيح العلم.

الوزير : لكن..

السلطان : اسمع يا وزير.. تفرج حالاً عن نبهان وعمران.

الوزير : أمر مولاي .

الأهالى : استنى يا وزير.. احنا جايين معاك (يخرج الوزير والأهالى).

ذهب : آمنت يا والدى ان أوسكارو عمره ما كان صديق لنا
ولا كان بيحبنا.

السلطان : آمنت يا ذهب.. لكن بعد إيه.. بعد ما خد ذهبنا
وخيرنا وضحك علينا طول السنين اللي فاتت.. طول
عمرنا واحنا موجهين البوصلة ناحية أوسكارو.. عمرنا
ما فكرنا نغير اتجاه البوصلة ونوجهها لضميرنا وأصالتنا
وجذورنا.. أو نوجهها لآخواتنا وجيراننا اللي من دمنا
ولحمنا وأصلنا.. ومشينا ورا أوسكارو لما غرقنا فى وحل
العجز والتخلف والجهل.. ياربتك كنتى فوقتينا من
زمان يا ذهب.

ذهب : اللي فوقنا كلنا يا والدى الحكيم نبهان وابنه عمران.

حرب (يدخل مكملًا كلام ذهب) وشمس الزمان.

السلطان : حرب !! .

ذهب : فين شمس؟

شمس : (تدخل وتعانق ذهب) أنا اهو يا ذهب .

- حرب** : سامحنى يا عمى .. أنا غلطت فى حقك وفى حق كل
أهالى المدينة.. وجى بامد لك ايدى.
- السلطان** : حرب ابن اخويا.. عمر الدم ما يبقى ميه .
- ذهب** : جيت فى وقتك يا ابن عمى.. علمت باللى حصل
للمدينة؟
- حرب** : ما تقلقيش يا أميرة.. سفن الطعام جاية فى الطريق.
- شمس** : خلاص يا ذهب.. الملك حرب الجيران من هنا ورايح
حبيقى حب وسلام وأمان للأهل والجيران
(يدخل نبهان وعمران والزنان والأهالى والوزير)
- عمران** : شمس.
- نبهان** : بنتى .
- السلطان** : نبهان.. يا راجل يا عظيم.. أنا مش عارف ازاي حكمت
عليك بالسجن.. لكن أوسكارو اللعين هو السبب .
- حرب** : أوسكارو خلاص ماعادلوش وجود بيتنا .
- السلطان** : تعرفوا لو ماكنتش افرجت عنكم.. كنت حافضل طول
عمرى ندمان.

عمران : مش مهم اننا نندم على اللي فات.. لكن المهم اللي جى..

دهب : انا سعيدة قوى يا والدى للى أنا شيفاه.. سعيدة لأن

حكيم الزمان أو صاحب العلم والفكر والقلم مابقاش

مصيره زى ما بنسمع.. انه يتشرد ويتغرب عن بلده..

أو يعيش منطوى على نفسه فى عزلة بعيد عن الناس..

ويموت من غير ما حد يحس بيه.. أو يترمى فى السجن

بقيت عمره.. ولأ يتحكم عليه بالإعدام.. فعلا لأول مرة

يا والدى فى تاريخ المملكة.. ندى لحكيم الزمان حقه..

ونحاول نقرب منه ونسمع هو بيقول إيه.

السلطان : مش كده وبس.. أنا أصدرت فرمان بعزل الوزير كبشان

وتعيين الحكيم نبهان وزير لمدينة الذهب

نبهان : من غير تعيين يا مولانا السلطان.. أنا وأولادى وكل

أهل بلدى معاك وايدنا فى ايدك.. لكن بلدنا أولى بينا

ولازم نرجع لها.. وبالحب والإخلاص والأخوة حتلاقينا

جنبك فى أى وقت .

دهب : ياريت يا والدى تتخلص من كل أصدقاء السوء والشر

ويبقى لنا نصيب فى كل القلوب الطيبة.

السلطان : إن شاء الله يا ذهب.. من هنا ورايح.. مش حيكون لنا
نصيب غير فى القلوب الطيبة.. لأن معدنا طيب..
وأصلنا طيب.. وأرضنا طيبة.. واحنا طيبين.. والله
العظيم طيبين .

(وببدأ الاستعراض الأخير حيث يشارك فيه كل
أبطال العرض)

الجميع : طيبين والله احنا طيبين

مهما جينا ولا روحنا طيبين
طيبين بسماح قلوبنا طيبين
طيبين وجميع شعوبنا طيبين
طيبين واللى يعاشرنا ..
يعرف اننا طيبين.. طيبين

بس فى الزمن الضير

وحقد اوسكارو الخطير

اللى ما عندوش مبادئ

أو مروّه أو ضمير

الطيابة.. تبقى يابا.. فينا بلوة

وتبقى لينا أمر محنة

لما يبقى هو أفعى

واحنا لسه زى ما احنا.. طيبين

شمس : شمس بكره بتنادينا

بس ليها شروط علينا

عمرها ما حتبقى ليينا

غير لو اتلمت إيدينا

وبإيماننا وإرادتنا

اتبني البنيان متين

الجميع : طيبين والله احنا طيبين

حرب : اوعى تستعرض جنونك

أو سلاحك أو فنونك

ع اللى من دمك ولحمك

واللى كانوا فى يوم حصونك

شيل غشاوتك عن عيونك

ده لحماسك محتاجين

الجميع : طيبين والله احنا طيبين

الزنان : اوعى يوم تستنى قوتك

من ايدين تتمنى موتك

اصحى واعرف مين عدوك

قبل ما الأيام تفوتك

لو ذهبنا منا فينا

مش حنبقى شحاتين

الجميع : طيبين والله احنا طيبين

السلطان : خيرنا ليه يبقى لغيرنا

ليه ننام ونبيع ضميرنا

العدو ينهب ذهبنا

ويمشى آمن فوق ترابنا

وبعد ما يقوى يحاصرنا

ويكشف الوش اللعين

الجميع : طيبين والله احنا طيبين

الوزير : نضفوا السوس اللى فينا

واوعوا تنسوا دروس ماضيها

فتشوا ورا كل واحد

مين معانا ومين علينا

لو فيه واحد بيتا خاين

نبقى ضعينا أجمعين

الجميع : طيبين والله احنا طيبين

نبهان : الزيادة فى العمالة

عمرها ماكانتش عالية

افتحوا مصانع جديدة

واقضوا ع النوم والبطالة

الخواجات استحالة

يبقوا غير مستعمرين

الجميع : طيبين والله احنا طيبين

ذهب : احنا كلنا أصل واحد

واللغة وتاريخنا واحد

والعدو لبلادنا واحد

ليه ما نبقاش قلب واحد

ليه نعيش متفرقين

الجميع : طيبين والله احنا طيبين

عمران : احنا كنا فى الصدارة

للتاريخ تشهد حضارة

واتاكلنا واتاكلنا

واتدائنا يا ميت خسارة

الحياة عايزة الجسارة

والعرق والشقيانين

الجميع : طيبين والله احنا طيبين

ستار

تمت بحمد الله

العمل للمؤلف

• صدر له

- | | | |
|------|--|--------------------|
| ١٩٨٩ | ديوان شعر (بالعامية المصرية) | صور على جدار الزمن |
| ١٩٩٩ | مسرحية شعرية (بالعامية المصرية) | لحظات ساخنة |
| ٢٠٠١ | مسرحية (دليل النصوص الجزء الثاني) | شيلوك ياهو |
| ٢٠٠٢ | مسرحية (دليل النصوص الجزء الخامس) | استعماريكا |
| ٢٠٠٧ | مسرحية (دليل النصوص ج الثاني والعشرون) | العملية ٠٠٧ |

• الأعمال المسرحية

اسم العمل	المخرج	مكان العرض	جهة الانتاج
١- مدينة الأبواب السبعة	محمد حسن	بور فؤاد	قصور الثقافة ١٩٩٨
٢- بعزائيكا	همام تمام	المنيرة/ جيزة	قصور الثقافة ٩٩
	خالد الخربوطلي	ساحل سليم/ اسيوط	قصور الثقافة ٩٩
٣- لحظة حب	ياسر صادق	مسرح السلام	مسرح الشباب ٢٠٠١
٤- مشعلو الحرايق	د.عوني كرومي ٢٠٠٢	مسرح الهناجر	مركز الهناجر للفنون/ الأوبرا
		مسرح الرور ألمانيا	مثلت مصر في مهرجان الرؤية بألمانيا ٢٠٠٢/٩
٥- شايوك ياهو	فهيم الخولي	الاسكندرية	النصر للسيارات ٩٧
	محمد دياب	الغنايم/أسيوط	قصور الثقافة ٢٠٠٣

هيئة قناة السويس ٩٨	بور سعيد	محمد حسن	٦- استعماريكا
قصور الثقافة ٢٠٠٣	المحلة الكبرى	محمد فتحي	
قصور الثقافة ٢٠٠٤	أبو تيج	محمود الشوربجي	٧- العملية ٠٠٧
إنتاج سعودي ٢٠٠٥	السعودية	بطولة/ أحمد بدير	٨- وحدي في المنزل
إنتاج سعودي ٢٠٠٥	السعودية	بطولة/ حسن مصطفى	٩- مباراة ساخنة
قطاع خاص ٢٠٠٦	فيصل ندا	مجدي الناظر	١٠- يا احنا يا همه
انتاج سعودى ٢٠٠٦	السعودية	مصطفى الصغير	١١- برجوش دوت كوم
البيت الفنى ٢٠٠٩	مسرح الغد	همام تمام	١٢- بعزائكا

• أشعار مسرحيات ومسلسلات

العمل	المخرج	مكان العرض	جهة الإنتاج
١- مسرحية نقول إيه	فهمي الخولي	مسرح السلام	البيت الفني ٩١
٢- مسرحية الأرنب المغرور	فهمي الخولي	المسرح العائم	البيت الفني ٩٢
٣- مسلسل هدية لماما	حازم عبيس	التلفزيون	التلفزيون ٨٩
٤- مسلسل ترحال	مسعد فودة	التلفزيون	صوت القاهرة ٩٨
٥- مسلسل داليا وسمس في بلاد العجائب	أسباني	A.R.T	تاميدو للإنتاج ٩٣
٦- مسرحية امس واليوم وغد	ياسر صادق	قصر ١٥ مايو	قصور الثقافة ٩٩
٧- اشعار مسرحية ميت راحة	محمد دياب	الوادي الجديد	قصور الثقافة ٢٠٠٠
٨- اوبريت حابس الوحش	سيد البنهاوى	الفيوم	قصور الثقافة ٢٠٠٢

القومى للطفل ٢٠٠٦	- الأنفوشي -فاطمة رشدي	زين نصار	٩- أشعار مسرحية كوخ الطيبين
البيت الفنى ٢٠١٥	مسرح متروبول	زين نصار	١٠- اشعار مسرحية الرسام الموهوب

• المسرح العمالى

م	العمل	المشاركة	المخرج
١	خشب الورد	اشعار ١٩٨٨	فيصل عذب
٢	ملك الشحاتين	اشعار ١٩٨٩	فيصل عذب
٣	حارة الضحك	اشعار ١٩٩٠	فيصل عذب
٤	نقول طور	اشعار ١٩٩١	فهيمى الخولى
٥	العب يا ميمون	اشعار ١٩٩٣	فهيمى الخولى
٦	لعبة المنسر	اشعار ١٩٩٥	فيصل عذب

٧	دى مملكة	اعداد واشعار ١٩٩٦	فيصل عذب
٨	شايوك ياهو	تأليف واشعار ١٩٩٧	فهيمى الخولى
٩	استعمارىكا	تأليف واشعار ١٩٩٨	محمد حسن
١٠	احلى الاحلام	اشعار ٢٠٠٠	محمد كريم
١١	عرس كليب	اشعار ٢٠٠٠	فهيمى الخولى
١٢	الناس اللى همه	تأليف واشعار ٢٠٠١	صفوت حجازى

● عروض استعراضية لفرق الفنون الشعبية (المسرح العمالى)

م	العمل	المشاركة	المخرج
١	جنون البشر	تأليف واشعار ١٩٩٦	هشام جمعة
٢	حزوقة	تأليف واشعار ١٩٩٨	صفوت حجازى
٣	بعزائىكا	تأليف واشعار ١٩٩٩	خالد حسنى
٤	فنون مصرىة	تأليف واشعار ٢٠٠٠	احمد يونس
٥	القدس عربىة	تأليف واشعار ٢٠٠١	صفوت حجازى

• كتابة سيناريو

فيلم رسوم متحركة اخراج ايمن الشلتاوى ١٩٩٢ / قطاع الانتاج	من الأهم
فيلم رسوم متحركة اخراج ايمن الشلتاوى ٢٠٠٢ / قطاع الانتاج	الحمامة المطوقة

• اعداد برامج

غناء أحمد الشبوري وسهير طه حسين اخراج مديحة الغنيمي إذاعة صوت العرب ١٩٩٠	برنامج تأملات
اعداد مجموعة حلقات القناة الأولى التلفزيون ١٩٩٥	برنامج أمني وأغاني

• كتابة الأغاني

أكثر من ألف اغنية للعديد من المطربين والمطربات المصريين والعرب

على سبيل المثال: محمد رشدى ، ليلى غفران ، هشام عباس ، شهاب حسنى ،
شيرين وجدى ، حنان عطية ، احمد عدوية ، حسن عبد المجيد ، شادية حسنى ،
بحر ابو جريشة ، حسين بشير ، احمد الكحلاوى ابراهيم عبد القادر
الخ

تحذير

يحذر استغلال كل أو بعض هذا الكتاب دون أخذ موافقة كتابية

من المؤلف محمد الصواف

للتواصل مع المؤلف : ٠١١١٠٩٢١٠٩٦ - ٠١٠٠ ٥٣٠٧٤٠٤

Mohammedsawaf22@yahoo.com

Mohammedsawaf2@gmail.com

